

**SOERA MPOAGAMA  
NTAOE ANOE MESOEA  
SIDI MASEHI.**

(Lesboekje voor jongelieden  
in het landschap Posso, die  
lidmaat der Christelijke ge-  
meente wenschen te worden)

NAAMLOOZE VENNOOTSCHAP  
VAN DE RHEE'S DRUKKERIJ  
ROTTERDAM 1917

Wasow  
BV3350  
S93

(c) 112 34.8  
2101  
X

### I. Djaja mpanjomba nto lino ri Poeë Sindate.

Poera<sup>2</sup> taoe ri wawo lino lawi naintjani Poeë ntana  
pai oeë, paikanja mosisala djaja mpanjombanja ri Sira,  
pai pampapoto'ona Sira. Djaja mpanjomba se'e ndato'o  
agama. Pai napampepali ntaoe Poeë jangi sindate, maka  
lawi naepemo, ane dja ngkalionja, bare'e rodo rajanja,  
pai bare'e wo'oe gana rosonja. Paikanja maria dja'a ntaoe  
pai naka poera mawonja ri Poeë sindate, pai naka bare'emo  
napodjo mampepali Sira pai songkaa.

Sa'e taoe manto'o: ane gana pangkonikoe, pai poedjoe  
ngkorokoe, pai gana aga<sup>2</sup>koe, da rodo sangkani rajakoe,  
maoe bare'emo koepепали Poeë sindate. Ntongo madonde  
si'a, bara rodo jaoe rajanja, paikanja ane madjoe'a bara  
naroempa ntjoesa, lioe<sup>2</sup> naepe bare'e gana ane natandje  
poera<sup>2</sup> setoe.

Sa'e pelo mampobangke kadoro ngkatoewoe, ndjairia  
rodomo rajanja; paikanja ane bare'e nakoto mampakadore  
katoewoenja, pai re'e anoe napomanee ndaja, lioe<sup>2</sup>  
naepe soa rajanja, kabare'enja naendo i Poeë sindate.

Sa'e wo'oe pelo koeasa pai kabangke ngkatoewoe  
napobangke. Paikanja ane majalimo koeasa setoe ri si'a,  
bare'emo re'e anoe da napakarodoka rajanja.

Taoe anoe mampepali i Poeë sindate, pai mantandje  
Sira, ntje'e anoe rodo rajanja pai maroso katoewoenja.  
Motoeka wo'oe parata ndaja ntaoe i Poeë sindate; sa'e  
sabangke parata ndajanja, sa'e djamo sakodi, paikanja  
anoe ndaaja mPoeë, ntje'e kaboeja ndajata ri Sira.

Agama nto lino (djaja mpanjomba ri Poeë sindate)  
maria ngaja. Anoe lawi taintjani to'ona ntje'e agama nTo  
Polamo, ewa djaja ntaoe toe'ata; nepa re'e wo'oe agama  
Masehi; pai agama Isilamoe.

Agama nTo Polamo podo maama<sup>2</sup>si i Poeë sindate, maka maria lamoanja, pai maria mpanga djajanja mampepali dago ngkatoewoe, kobelaanja bare'e djela taoe ri poe'oenja mpodago, anoe mangkekeni inosa ntaoe.

Agama nTo Isilamoe napare'e ntaoe samba'a, i Nabi Mohamad to'ona. Naintjanijaoe i Poeë Ala, bare'e ngkabongo nato'o: i Poeë Ala podo samba'a<sup>2</sup>, wa'anja Sira Poeë ntaoe. Paikanja bare'e gana djajanja, maka nasapoe kai-Poeë-Isanja mangaosoe sala ntaoe.

Agamata kita To Masehi, ntje'e djaja majoa ri Poeë Ala, anoe ndatoedjoeka kita mPoeë Isa, Anaa anoe mena'oe ri wawo lino, mangaosoe sala ntaoe. Agama Masehi radoea ngaja wo'oe. Poera<sup>2</sup> To Masehi mantandje i Poeë Isa, paikanja sa'e mampowo'o tadoe mpanjomba bangke anoe ri Roma kare'enja, Paoes to'o noe lantinja; woewoenja anoe nato'o noe Paoes se'e naaja poera<sup>2</sup>. Taoe se'e ndapapoto'o To Masehi Rooms. Nepa To Masehi ewa kita, anoe bare'e maaja Paoes, podo soera mPoeë Ala pantandjeta, ntje'e ndapapoto'o: To Masehi Indjili.

**POMPEOASI:** Taoe mbe'i anoe maintjani Poeë ntana pai oeë? Ndjaa ndato'o agama? Makoedja pai napampepali ntaoe i Poeë sindate? Ndjaa masalempori taoe mampepali i Poeë? Wambe'i panto'o ntaoe sa'e pai naka bare'e napepali i Poeë? Taoe mbe'i anoe rodo rajanja pai maroso katoewoenja? Bara sawia<sup>2</sup> paintjani ntaoe i Poeë Ala? Sangkoedja ngaja agama noeintjani? Ndjaa agama nTo Polamo? Ndjaa agama Isilamoe? Ndjaa agama Masehi? Ndjaa posisalanja anoe ndato'o Masehi Rooms pai Masehi Indjili?

## 2. Paintjani ntaoe i Poeë Ala.

Pai napaintjani ntaoe i Poeë Ala, maka lawi mompaoe ri raja ntaoe, oengka'ri katoewoe i Adama pai i Hawa. Pai naka bare'emo josa gaga pangkita ndaja ntaoe i Poeë se'e, maka maria dja'a nto lino. Dja'anja se'e mampakaboeta rajanja; bare'emo nakita Sira, kobelaanja mariamo ngaja lamoan napare'e ngkalionja, anoe banja i Poeë kodjo. Paikanja bare'e wo'oe lioe<sup>2</sup> nakalingani ntaoe Poeënja sindate. Bare'e ngkabongo taintjani dja songka mPoeë sa'e anoe manto'o: Aja inemoe, pai papamoe; ne'e mosalara; ne'e melima. Bare'e ngkabongo taintjani maapoka reme sa'e, maoe bare'e montjo toendainja (poe'oenja). Bare'e ngkabongo taintjanimekakai ri Sira; taintjani wo'oe merapi poeroe ri poandoe sala, pai ri pontjempa panga.

Pai tapaintjani i Poeë, maka tongawa kare'ea pai koeasaa ri pewali noe lino pai banganinja poera<sup>2</sup>. Isema anoe mampare'e poera<sup>2</sup> anoe nakita noe mata ane banja Sira? Isema mampapesoewoe berese pai mampakatoedoe oedja mpongojoe, iseama mampapebeteka kita reme pai woeja ane banja Sira?

Ri katoewoeta sangaja<sup>2</sup> tongawa koeasa mPoeë: paeta tesaojo mewali, tesaojo bare'e; kita tesaojo madjoe'a, tesaojo madonde<sup>2</sup>. Mewali monawa<sup>2</sup>mo taoe manto'o: sangaja<sup>2</sup> re'e poe'oenja pai naposisala ngkatoewoe ntaoe; sangaja<sup>2</sup> re'e poe'oenja anoe mantilaka kita dago pai dja'a.

Tesaojo morasi kita pai tapanto'o: mapoeroe raja mPoeë sindate ri jakoe. Tesaojo naroempantjoesa kita pai tapanto'o: manoro re'e salakoe, pai ndapahoekoe mPoeë sindate jakoe. Tesaojo maoe tapari<sup>2</sup> mampepali anoe tatoenggai ndaja bare'e tarata, tato'omo: bare'e ndawai mPoeë tangara ndajakoe pai naka bare'e mewali. Oengka ndjairia manotomo rajata i Poeë sindate mangalengko katoewoeta.

Paikanja ane tapepali ngkaliota i Poeë sindate, bare'e

da tarata ndaja mpodago. Wa'anja koeasa mPoeë anoe tarata ndaja. Kaboeja ndajaa ri tolino bare'e tarata ndaja ngkaliota. Ntje'e pai nakare'e nabi ndapokaoe tesaojo rata ri tolino, manto'oka taoe raja mPoeë. Maka anoe ndato'o nabi, ntje'e taoe anoe ndapadjelaka mPoeë Ala paoea ri rajanja; nepa si'a wo'oe mampasowaka joenoe paoe mPoeë se'e.

Maria nabi mPoeë Ala rata ri taoe toewoe riae: i Moesa, i Semoeëli, i Elia, i Elisa, i Jesaja, i Jeremia. Paikanja bare'e wo'oe gana panto'okanja kita gori ngkatoewoemPoeë Ala. Ntje'e pai ndapampokaoemo i Poeë Isa, Anaa, mewali i mPoeë Isa manotomo raja ntaoe gori ndaja mPoeë Ala ri tolino, maka taoe anoe mangkita ndaja i Poeë Isa, ntje'e mangkita Poeë Ala. Oengka ndjairia manotomo rajata, maria salata ri Poeë sindate, pai manoto wo'oe rajata djaja ngkateosoenja. Oengka ngkadjela i mPoeë Isa manotomo rajata kapoerue ndaja mPoeë Ala ri tolino.

**POMPEOASI:** Makoedja pai napangkalingani nto lino Poeë Ala? Ndjaa sa'e anoe bare'e nakalingani? Rimbe'i sa'e katongawa ngkoeasa mPoeë Ala ri tolino? Bara gana paintjanita i Poeë Ala ane tapepali ngkaliota? Ndjaa anoe ndato'o nabi? Isema to'o noe nabi sa'e? Isema tando mpampokaoe i mPoeë Ala rata ri tolino? Oengka ngkadjela i mPoeë Isa noendjaa anoe manotomo ri rajata?

### 3. Soera i mPoeë Ala.

Taoe toe'ata bare'e naintjani ma'oeki soera. Podo ngoedjoe ntaoe anoe manto'oka ananja gori laolita ntaoe toewoe riae. Kobelaanja sa'e ndakalingani moeni, sa'e ndawali, sa'e ndarangani pai naka bare'emo manoto laolita setoe.

Kadagonja wa'a noentoe mPoeë Ala, anoe naparataka kita noe wa'a nabi pai i Poeë Isa Anaa, poeramo na'oeki ntaoe ri soera. Ntje'e pai naka bare'emo nakalingani ntaoe Noentoe setoe. Ane bare'emo manoto rajanja sa'e, da nawalibasa ri soera mPoeë Ala.

Soera mPoeë Ala maria soera anoe tepasambaka, romoenja 66 soera, maka bara tesangkoedja taoe anoe manga'oeki. Radoea tilanja anoe bangke: Soera Masae, pai Soera Dawo'oe. Ri Soera Masae kalaoe laolita ntaoe piamaota pai To Israeli. Laoe wo'oe soera wa'a nabi anoe ndapokaoe i mPoeë Ala ri taoe setoe. Ri Soera Dawo'oe laoe laolita i mPoeë Isa, pai soera i ntjoero (Rasoel) Paoeloe pai anagoerue i mPoeë Isa sa'e. Soera se'e bangke jowenja mampakanoto rajata gori ngkama'i i mPoeë Isa; laoe wo'oe maria patoedjoe ri wa'a nTo Masehi.

Soera mPoeë Ala se'e tesaojo ndapapoto'o: Soera mpodjandji mPoeë Ala. Paikanja mosisala podjandji mPoeë Ala ri Soera Masae pai Soera Dawo'oe. Maka ri Soera Masae ewase'i podjandji mPoeë Ala ri tolino: Komi to lino, ane ndiloeloe wa'a songkakoe, da koepakadago katoewoemi. Oengka ngkadjela i mPoeë Isa nepa re'e djandjia: Ane meaja kodjo komi ri Anakoe, sangaja<sup>2</sup> koepoana wo'oe komi. Samba'a wo'oe to'o Ntjoera Dawo'oe: Soera Noentoe ngKatoewoe; maka ririamo kalaoe noentoe anoe ndakenika kita i mPoeë Isa.

Laolita i mPoeë Isa aopo taoe anoe ma'oeki: i Matioe, i Marakoesi, i Loekasi, pai i Johane. I Matioe pai i Johane

lawi ana goeroe i mPoeë Isa. I Marakoesi pai i Loekasi banja ana goeroe i mPoeë, paikanja ri pa'oekinja wa'a ntoentoe i mPoeë Isa naapeoasimo ri joenoe rioenja.

Ri palai i mPoeë Isa mewalili ri wawo jangi, bare'epa nda'oeki wa'a ntoentoe pai powia mPoeë Isa, wa'anja nganga noe ana goeroe anoe mampetoemboeka taoe. Paikanja masae<sup>2</sup> nda'oekimo jaoe, boi ndakalingani, ane matemo ana goeroe mPoeë anoe lawi mojoenoe<sup>2</sup> mo pai Sira.

Rioe<sup>2</sup>nja soera se'e dja na'oeki mpale, mewali bare'e maria mba'asi'a. Oengka ngkare'e masina mpo'oeki mariamo Soera Noentoe ngKatoewoe. Soera se'e na'oeki noe Ana goeroe ri basa nTo Garika, paikanja wawase'i ndalimbamo ri basa mpengaja<sup>2</sup>, re'emo tē 400 basa. Samba'a Soera se'e, anoe na'oeki i Loekasi roo nalimba i nToea Adriani ri basata.

Ane tabasa sangkani Soera Noentoe ngKatoewoe, maria ngaja anoe bare'epa tarata ndaja, maka majomboe pompaqe i mPoeë, pai rede wo'oe panto'oa. Ntje'e pai nakare'e ntjoera radoea na'oeki i nToea Adriani, samba'a anoe mampetoemboeka kita Laolita nTaoe Piamo pai To Israeli, pai samba'a anoe mampetoemboeka kita Laolita mPoeë Isa pai Ana goeroenja. Ane poeramo tabasa radoea soera setoe, nepa tarata ndaja wo'oe Soera Noentoe ngKatoewoe kodjo.

Noentoe mPoeë Ala tapomata ndaja. Anoe bare'e laoe ri Soera mPoeë Ala, ne'e taaja. Ntje'emo posisalata kita To Masehi Indjili pai To Masehi Rooms, maka panto'o ntaoe setoe: gori mpanto'o noe Paoes ri Roma ntje'e taaja. Mewali bare'e ntani nawai mpandita Masehi Rooms da nabasa ntaoe sondo Soera mPoeë Ala.

PÖMPEOASI: Makoedja pai nakalingani ntaoe toe'ata Noentoe mPoeë Ala? Makoedja bare'emo da nakalingani ntaoe Nöentoe mPoeë wawase'i? Sangkoedja ntila Soera mPoeë Ala pai ndjaa to'onja? Ndjaa bangani nTjoera Masae? Ndjaa bangani nTjoera Dowo'oe? Ndjaa

ndadjandji mPoeë Ala ri Soera Masae, ndjaa ri Soera Dowo'oe? Isema ma'oeki soera laolita mPoeë Isa? Ndjaa paintjanimoe gori mpa'oeki nTjoera se'e, pai basanja? Bara re'emo Soera mPoeë Ala saga'a ri basata? Wambe'i posisala nTo Masehi Rooms pai kita To Masehi Indjili?

#### 4. Poeë Ala.

I Poeë Ala samba'a<sup>2</sup> katoewoea. Bare'epa re'e lino se'i laoemo i Poeë Ala. Pai maoe bare'emo re'e lino se'i, sangaja<sup>2</sup> da ndate i Poeë Ala. Bare'e re'e anoe kasiogoe mPoeë Ala. Poera<sup>2</sup> lamoaa podo watoea mPoeë anoe sangaja<sup>2</sup> me'oeroe ri Sira.

I Poeë Ala anoe mokoeasa mpodago, maka Sira anoe mampapewali lino se'i pai banganinja. Sira toempoe inosa ntaoe pai mpengaja<sup>2</sup> anoe toewoe ri wawo lino. Sira majawataka anoe bare'e ndapokono, pai ndapapewali anoe gori ndajaa.

Magali kodjo i Poeë Ala: Bere'e denggo bara dja'a metaka ri Sira. Majoa sangkani Sira. Mareme rajaa, bare'e re'e kawenginja, maoe sakodi bare'e.

I Poeë Ala bare'e bali-bali rajaa. I Poeë anoe mawawanaka i Boerahima pai i Daoedi bare'e mosisala pai i Poeë Ala anoe mawawanaka kita se'i. Anoe ndapokaraoeka i Adama pai Hawa, sangaja<sup>2</sup> ndapokaraoeka wo'oe kita se'i<sup>2</sup>, ane ewase'e wo'oe gaoeta ri Sira.

Bangke kodjo katoewoe mPoeë Ala. Lamoaa katoewoea, bare'e mokoro ewa kita taoe. Kita taoe bare'e tarata ndaja mpodago kare'ea. Mewali ane kono tapasimbadjoe i Poeë Ala, sangadi tapaporapa nepa tarata ndaja sakodi.

Ane koeto'o mata i mPoeë, pale i mPoeë, talinga i mPoeë, podo rapa mpaqe poera<sup>2</sup> setoe. Kamontjonja i Poeë Ala mangkita poera<sup>2</sup> ngaja anoe mewali ri wawo lino; maoe bare'epa mewali, maoe anoe laoedja ri raja ntaoe, sangaja<sup>2</sup> ndakita. Ndadonge wo'oe poera<sup>2</sup> paoe nto lino,

anoe montjo pai anoe bare'e montjo. Palea mamparenta poera<sup>2</sup> taoe, mawawanaka, malikesi raja ntaoe, mampa-pewali poera<sup>2</sup> gori ndajaa.

I Poeë Ala angga katoewoea pai nakadjoekoe ngkare'ea ri wawo lino. Maoe mesamboeni kita ri raja ntana, ndjaoe i Poeë; bara lawa pelindjata ri tana ntaoe, sangaja<sup>2</sup> ndjaoe i Poeë Ala.

Oengka ngkadjela i mPoeë Isa ri wawo lino, nepa manoto sakodi rajata maintjani Poeë Ala. Ndato'o i mPoeë Isa: Taoe anoe mangkita jakoe, ntje'e mangkita i Poeë Ala. Koeasa i mPoeë Isa ntje'emo koeasa i mPoeë Ala; kajoa ndaja mPoeë Isa ntje'emo kajoa ndaja mPoeë Ala.

Nepa ndjairia tarata ndaja: i Poeë Ala sawia<sup>2</sup> rajaa ri taoe poera<sup>2</sup>. Ntongo i owi nato'o nTo Jahoedi: Poeë Ala podo maboeja raja ri kami, ri To Polamoja bare'e. Paikanja panto'o i mPoeë Isa: Maboeja raja mPoeë Ala ri taoe poera<sup>2</sup>. Bare'e ndaintjani mPoeë mokole pai watoea, toeama pai we'a, taoe kore'e pai taoe kaasi<sup>2</sup>. Ane masala taoe bangke pai taoe kodi sawia<sup>2</sup> hoekoenja. Bare'e ndaintjani mPoeë Ala inampaposisalai taoe.

Pai sangajapa anoe ndapatongawa i mPoeë Isa ri kita: i Poeë sindate bangke kodjoe kapoeroe ndajaa ri kita to lino. Maka kamontjonja da ndaopisakamo kita taoe ewa ri katoewoe i Noho, gori ngkaria ntjalata; paikanja ndapokaoe Anaa rata ri kita, ma'i mantjompo salata. Paikanja ane 'ntongo tapokono anoe modenggo pai anoe madja'a, bare'e ndakoto mPoeë mampokapoeroe kita, maka kagali ndajaa pai naka bare'e ndakoto mampoana taoe anoe bare'epa ndaosoe mPoeë Isa salanja.

Anoe takita ri Poeë Ala, tatogo ngajanja: Papa, Ana pai Inosaa paikanja podo samba'a Sira. Maka ri kaPapaa i Poeë Ala ndapare'e lino se'i pai banganinja, ndapare'e kita to lino. Ri ka'Anaa toedoe i Poeë ri wawo lino mangaosoe sala ntaoe. Ri ka'Inosaa marooroo Sira ri raja ntaoe, pai naka noto ndajata ri wa'a mpaoea pai songkaa.

**POMPEOASI:** Ndjaa ndato'o: i Poeë Ala samba'a<sup>2</sup> katoewoea? Ndjaa posokinja: i Poeë Ala mokoeasa? Ndjaa posokinja: i Poeë Ala magali rajaa? Ndjaa posokinja: i Poeë Ala bare'e bali-bali rajaa? Ndjaa posokinja: Djoekoe<sup>2</sup> ri wawo lino kare'ea? Ndjaa posokinja: i Poeë Ala lamoa katoewoea? Makoedja koeto'o: mata mPoeë? talinga mPoeë? pale mPoeë? Rimbe'i kanotonja raja mPoeë sindate sawia<sup>2</sup> ri taoe poera<sup>2</sup>? Waimbe'i gori ngkapoeroe ndaja i mPoeë? Makoedja koeto'o: i Poeë Ala se'e: Papa, Ana pai Inosaa?

### 5. Pamparenta i mPoeë Ala tolino.

I Poeë Ala anoe mampare'e lino pai wa'a banganinja. Paikanja banja bara ndakaka'idja<sup>2</sup>ka nepa mewali; sambela<sup>2</sup> paoea manto'o: nakareme! pai marememeo. Nepa ndapowia poera<sup>2</sup>, anoe kodi olinja rioenja, modede<sup>2</sup> rata ri anoe bangke olinja. Ewa kadjoe masiwoe, kadjoe bose, baoe, tontji, pinatoewoe ri wawo ntana, pai ri tandonja mpodago ndapowia taoe.

Poe'oenja pai ndapampowia mPoeë Ala taoe, maka mawo rajaa naka re'e anaa anoe maintjani mânjomba pai me'oeroe ri Sira, anoe maintjani maloeloe songkaa. Bangke raja mPoeë naka re'e anaa, anoe da ndapakapoeroe, anoe da ndapakadago katoewoenja.

Sangaja wo'oe anoe ndapare'e mPoeë Ala, mala'eka to'ona. Mala'eka se'e lamoa katoewoenja, anoe ndapokaoe i mPoeë mampelindjaka songkaa, mangkariani tolino. Re'e wo'oe mala'eka madja'a, anoe bare'e maboeja rajanja ri tolino, anoe rajanja mangkelo<sup>2</sup> taoe da napaloeloe djaja modenggo. Wo'o noe mala'eka madja'a setoe ndapapoto'o i Madja'a.

Pampomawo mPoeë Ala tolino anoe ndapare'e, pai ndapangkariani saeo<sup>2</sup>, ndapatoewoe taoe poera<sup>2</sup>. Poera<sup>2</sup>

anoe mewali ri wawo lino sangaja<sup>2</sup> songka oengka ri Poeë Ala sindate. Ewa panto'o i mPoeë Isa: sako woejoea santoko pai nakanawoe ri tana, maka songka mPoeë. Bare'e re'e dago bara dja'a mewali ngkalionja, sangaja<sup>2</sup> paintjani i mPoeë.

Paikanja kita tolino bare'e tarata ndaja posongka<sup>2</sup> mPoeë Ala. Dago pai dja'a bare'e wo'oe bara sawia<sup>2</sup> ndapantilaka taoe. Tesaajo taoe majoa napere ntjoesa pai roegi, pai taoe anoe madja'a, anoe bare'e lioe<sup>2</sup> mampokono Sira, morasi katoewoenja. Maoe bare'e tarata ndaja pantila mPoeë dago ngkatoewoe, dja ne'e majali ri rajata: sangaja<sup>2</sup> i Poeë mampomawo kita.

Samba'a laolita anoe mampakanotoka kita kabare'enja sawia<sup>2</sup> pantila mPoeë rasi ngkatoewoe, ntje'emo laolita i Ajoebi. Maka maoe maria roegi pai soesa mampere si'a, bare'e bara bali rajanja mangkekeni Sira sindate.

Podo dago anoe ndapokono i mPoeë, paikanja pai naka ree ndja'a, maka lawito lino masala ri Poeë Ala, banja djajaa naloeloe, podo djajanja ngkalionja. Dja mampedongeka pompaoe i Madja'a pai naparata dja'a.

Tesaajo ndapetangani i mPoeë Ala taoe naka ne'e napowia anoe madja'a. Paikanja maria ngkani ndapapalioe dja'a ntaoe. Pai ndapapalioe gaoe madja'a, maka re'e tangara ndajaa anoe bangke. Rapanja dja'a noe toekaka i Joesoepoe ndapapalioe mPoeë Ala, da ndapampoampoe lembamo i Joesoepoe ri Tana Masiri, naka ne'e mate jogataoe. Rapanja pampobaloe i Joedasi Poeënja, ndapapalioe mPoeë Ala, naka mate anaa mantjompo sala nto lino.

Sangaja<sup>2</sup> ndahoekoe mPoeë Ala taoe anoe madja'a gaoenja. Ewa paopisakaa to lino ri katoewoe i Noho, maka ma'ai gaga pantjapoenna songkaa. Ewa Jeroesale pai napagero noe iwali, maka hoekoe i mPoeë Ala ri To Jahoedi kanatadjinja Anaa i Poeë Isa. Maria ngkani ndaparataka kita i mPoeë Ala djoe'a pai roegi nakatekaendo, naka tebalisaka rajata. Patoedjoe mPoeë se'e, da tapaendo<sup>2</sup>

pelindja ngkatoewoeta sangaja<sup>2</sup> kapoeroe ndajaa pai ndapampatoedjoeki kita. Maria tolino tengo, dja napakapeni raja.

Pawawanaka mPoeë tolino pai naka tesajo ndaloemboe anoe boetoena da mewali, posokinja: anoe bare'e tapomata<sup>2</sup>, anoe tapodjingki, ntje'e anoe mewali. Rapanja pampakoni mPoeë Isa taoe sond, pajalia djoe'a ntaoe ntjoroba napodjingki ntaoe. Pai wawase'e sangaja<sup>2</sup> ndapowia dja mPoeë Ala anoe tapodjingki, anoe bare'e tarata ndaja, maka Sira anoe mokoeasa. Pai sangadi re'e poe'oenja mpodago nepa ndawali songkaa woengka eo.

**POMPEOASI:** Waimbe'i podede pampowia mPoeë Ala wa'a bangani lino? Ndjaa poe'oenja pai ndapapowia taoe? Ndjaa anoe ndato'o mala'eka? Isema i Madja'a? Waimbe'i pangkariani mPoeë Ala anoe ndapowia? Makoedja bare'e tarata ndaja songka mPoeë Ala ri kita taoe? Makoedja pai tesajo tarata dja'a? Makoedja ndapapalioe mPoeë Ala gaoe ntaoe anoe madja'a? Bara ndahoekoe mPoeë Ala wo'oe taoe masala? Bara re'e wo'oe patoedjoea? Bara re'e powia mPoeë Ala anoe tapodjingki?

## 6. Sala nto lino.

Pampowia mPoeë Ala i Adama pai Hawa bare'epa re'e denggo ndajanja; majoa rajanja ri Poeënja. Tolino lawi toeroeki mPoeë Ala, maka raja ntaoe oengka ri Poeë Ala se'e kama'inja. Ntje'e pai napaintjani nto lino mompaoe; bangke koeasanja mampakanaja pinatoewoe jopo, mangawoesoe koronja, mampakaworo boejoe, mowote ri oe'e, meore ri raoa. Toewoe salapi, toewoe salapi kakoteranga-rangani paintjani ntaoe pai lo'enja, bare'e re'e kasiwianja ri anoe ndapowia mPoeë Ala.

Ndawaika mPoeë Ala ri tolino rajaa; posokinja: Banja watoea katoewoe ntaoe. Banja podo si'a ndaposongkaka, koronjamo se'e anoe mosongka<sup>2</sup>. Ane re'e songka mPoeë Ala, sangaja<sup>2</sup> maja nato'o: Bare'e koepokono setoe; bara: koepokono, maka moraja mokole tolino, banja moraja watoea.

Ane bare'e bali raja nto lino oengka i piamo, da mewalimo kodjo tangara ndaja i mPoeë Ala, manoro paka anaa wa'a nto lino, paikanja masala jaoe si'a.

Saeo-saeo tongawa salata. Lawi radoea ngaja salata: salata ri joenoe, pai salata ri Poeë sindate. Ane nato'o ngKoempania: Ne'e ndisampa benggami, pai tasampa jaoe, masala kita ri Koempania, i taoe. Ane napetangani ntaoe kita mampodoeanga doeanganja pai bare'e taaja paoenja, masala kita ri joenoeta, kasitaoeta.

Paikanja ane masina rajata ri joenoe, ane bare'e taposintoewoeka, tanawoesaka joenoe, tatima anoenja, talego<sup>2</sup>, tambambasi joenoeta, tapepate, bara tadjeani ngkabongo taoe gori ngkadja'a ndajata, banja podo masala ri joenoeta kita, sangaja<sup>2</sup> masala wo'oe ri Poeë sindate anoe papa ntaoe poera<sup>2</sup>.

Maria ngaja sala ntaoe paikanja samba'a<sup>2</sup> poe'oenja. Ntje'emo anoe ndapakanotoka kita ri laolita i Adama pai Hawa. Pampetangani mPoeë mangkoni woea ngkadjoe anoe ri tongo bonde Paradesi, djela i Madja'a, koronja ewa koro doeata. Napeoasi ri Hawa: Bara bare'e madago ndikoni woea ngkadjoe anoe ri bonde se'i? Mesono i Hawa: Madago kakoni, podo kadjoe anoe ri tongo bonde panto'o mPoeë Ala bare'e madago kakoni woeanja, boi mate kami. Mesono i Madja'a: Pai ndapanto'o ewase'e: maka ane ndikoni woea ngkadjoe se'i, da mokoeasamo ewa Poeë Ala komi, da ndiintjanimo poera<sup>2</sup> anoe madago pai anoe madja'a. Oengka ndjairia nakonimo i Hawa pai Adama.

Poe'oe ntjala se'e, pobangke<sup>2</sup> i Adama pai Hawa. Rajanja da mosongka ngkalionja, ne'emo i Poeë Ala masongkaka taoe setoe. Ntanoka songka i Madja'amo naloeloe.

Pobangke<sup>2</sup> i Adama pai Hawa tapopanta poera<sup>2</sup> kita

moelinja pai naka meewa taoe poera<sup>2</sup> ri Poeë Ala. Taoe toe'ata pai napangkalingani i Poeë Ala, maka rajanja da mosongka ngkalionja. Mokolenja anoe mate napolamoa, maka sawia<sup>2</sup> raja lamoai pai raja nto lino. Ndato'o mPoeë Ala: da tapokapoeroe joenoeta, ntanoka rajata dja podo mampokapoeroe korota, bare'e taendo<sup>2</sup> joenoe.

Sako ananggodi anoe bare'epa naintjani raoa sangaja<sup>2</sup> maewa inenja, meboende<sup>2</sup> madja'a rajanja ane bare'e mewali pepokononja, da nasoko noe inenja. Ndjairia tongawa peewa i Adama pai i Hawa tapopanta.

Anoe ndato'o masala ri Poeë Ala: ane tatalikoesi Sira pai taloeloe paoe i Madja'a, anoe da manawoe-saka kita. Ane masala kita ri Poeë Ala, sangaja<sup>2</sup> sawia<sup>2</sup> pewalinja ewa ri Adama pai Hawa: i Madja'a mompaoe ri rajata: da noetima setoe, nakawongko ndajamoe, da noembambasi joenoe, noeprasi, da noenawoesaka taoe setoe, noekabangke. Oengka ndjairia tapobangke anoe da taporasi, rantani tatalikoesi songka mPoeë: ne'e melima, ne'e kambamba<sup>2</sup>, dja taloeloe paoe i Madja'a.

Banja podo ri gaoeta kasalata, sangaja<sup>2</sup> ri pompaoeta masala wo'oe kita, ane tapetikodi joenoe bara tapakadjoe'a raja noe joenoe. Mae ri nawa<sup>2</sup>ta masala kita, ane tapepe-woloka anoe madja'a. Mae bare'e mewali anoe tanawa<sup>2</sup> se'e, sangaja<sup>2</sup> masala kita ri Poeë Ala anoe mangkita nawa<sup>2</sup>ta madja'a.

**POMPEOASI:** Rimbe'i tongawa kita taoe toeröeki mPoeë Ala? Rimbe'i tongawa raja mPoeë Ala taporaja? Sangkoedja ngaja sala ntaoe? Ndjaa poe'oe ntjalata? Waimbe'i toentoe ngkanawoe i Adama pai Hawa? Rimbe'i katongawanja tapopanta sala i Adama pai i Hawa? Bara tongawa wo'oe ri ananggodi? Ndjaa ndato'o masala ri Poeë Ala? Waimbe'i ane masala kita ri pompaoe pai ri ponawa<sup>2</sup>ta?

## 7. Anoe ndasilika i mPoeë Ala salata ri Sira.

Masalamo i Adama pai Hawa, maeamo raja, pelambenja napomaea; pai maeka raja, pai napasamboenikamo koronja ri ra jopo.

Bare'e ntaninja kita moelinja: Ane masala kita ri joenoe, maea matata, bare'emo tataha ndjo'oe<sup>2</sup> ri banoeanja, boi nakita pelambe<sup>2</sup>ta, posokinja: Salata ri si'a. Pai bare'e taowe<sup>2</sup> mampokaeka si'a, boi narata salata, da napodjangai bara da nagiwoe kita. Ane masala kita ri Sira sindate, maea matata ndjo'oe ri Sira ri pominggoe, bare'e ntani tatahamekakai ri Sira. Maeka rajata ri katoewoeta woengka eo; maka ane tarata pepa bara roegi, lioe<sup>2</sup> tato'o ri rajata: Ndapepalimo i mPoeë Ala salata (Ewa kasangkompo i Joesoepoe manto'o: Pampepali mPoeë Ala salanja ri toeainja, pai naparata pepa ri tana Masiri).

Pesoewoe i Adama pai i Hawa, ndaparesamo mPoeë Ala salanja, i Adama mantoedjoe i Hawa, i Hawa mantoedjoe i Madja'a.

Bare'e wo'oe ntaninja kita tolino. Ane ndapeoasi Mokole salata, magasi kita mantoedjoe taoe manto'o: i anoe mawai paoe pai koepaloeloe. Ane lo'oe anggata raneonja ri soeara mPoeë Ala, pai ndapeoasi salata, sangaja<sup>2</sup> da tato'o: Pai naka masala jakoe, maka i anoe mangkelo jakoe. Paikanja bare'e ndaaja mPoeë Ala setoe. Montjo i Madja'a mangkelo i Adama pai Hawa, paikanja lawi raja, ngkalionja, pai napaloeloe paoenja. Kita wo'oe lawi rajata, pai tapaloeloe paoe tadonge; mewali banja ri joenoe poe'oe ntjalata, sangaja<sup>2</sup> ri rajata pœ'oenja.

Ndahoekoe mPoeë Ala i Adama pai i Hawa. Kita se'i sangaja<sup>2</sup> ndahoekoe wo'oe mPoeë Ala kasalata, peewata. Maka maoe mapoeroe rajaa, be maja ndapapalioe salata maka magali sangkani rajaa, be maja ndaisoe dja'ata.

Peewa i Adama pai Hawa pai naka mate si'a; kita

wo'oe sili ntjalata, pai tapampokaeka da mate. Ane bare'e re'e salata ri Poeë Sindate, ane majoa sangkani kita ri Sira, bare'e bara da tapokaeka da mate, maka kapateta se'e djaja mpelimbata ri banoea mPapata, mewali be tapo'ipoe, bare'e tapokaeka da ndapodjangai kita.

Mosisala sili ntjalata, maka motoeka wo'oe paintjanita songka mPoeë. Sangaja<sup>2</sup> naintjani ntaoe toe'ata songkaa, maka sa'e lawi nda'oe kimo ri raja ntaoe. Paikanja ane takekenimo soera mPoeë Ala kalaoe wa'a ntjongkaa, bangke paintjanita pepokono ndaja i mPoeë. Mewali manga'a pehoekoe mPoeë ri taoe toe'ata, manee ri kita anoe maintjani poera<sup>2</sup> songkaa.

Bare'e wo'oe tasaja ane masala kita. Maka ane modenggo powiata, lioe<sup>2</sup> re'e nganga ndajata manto'oka kita: Masala siko; da ndahoekoe! Nganga ndajata se'e, ntje'emo nganga mPoeëta. Ane taloeloe djaja modenggo, lioe<sup>2</sup> napaoeka kita: Ne'e noeloeloe djaja setoe; banja djaja mPoeë setoe; djaja i Madja'a. Pai ane roomo tapowia anoe madja'a, bare'e wo'oe naowe mantjeko<sup>2</sup> kita. Sangadi bare'emo tapepedongeka nganga ndaja se'e dja tapakapeni rajata, da naowe mampompaoeka kita. Taoé anoe ewase'e mapari katoewoena, maka bare'emo nadonge patoedjoe mPoeë (Ewa i Mokole Saoeloe).

**POMPEOASI:** Waimbe'i rajata ane masala kita? Waimbe'i pesonota ane ndapeoasi salata? Rimbe'i kare'e ntjalata? Makoedja ndahoekoe i mPoeë Ala kita ane masala? Rimbe'i katongawa ntjili ntjalata pai takamate? Bara mosisala pahoekoe mPoeë Ala taoe masala? Ndjaa ndato'o: nganga ndaja?

### 8. I Tadoe ngKadago.

Wa'anja taoe anoe mangkoto maosoe sala ntaoe, ntje'e i Poeë Isa, ana mPoeë Ala, Tadoe ngKadago nto lino. Sira ndapokaoe i mPoeë Ala. Maka gori ngkapoeroe ndaja i mPoeë Ala ri to lino, pai ndapawaimo Anaa anoe samba'a<sup>2</sup> naka ne'e tetadji taoe anoe meaja ri Sira, paikanja nakatoewoe si'a ri banoea mPoeë Ala.

Mariamo taoe toewoe riae manto'o<sup>2</sup> da kadjela i mPoeë Isa, paikanja bare'epa naintjani to'oa. Tae anoe da ndapokaoe mPoeë Ala napapoto'o ntaoe setoe: i Masehi. Tae rata da manto'oka to lino da kadjela i Masehi se'e, nabi to'onja. Pagonja ri To Israeli (To Jahoedi) maria kodjo nabi djela.

Masae ratamo kodjo i Masehi ri To Jahoedi. Lawi napopeamo ntaoe se'e i Masehi, paikanja masala nawa<sup>2</sup>nja. Ri tempo ngkadjela i Masehi, mepoeëmo To Jahoedi ri Datoe ri Roma, paj mapari kodjo naepe pepoeënja se'e. Mewali panto'o ndajanja: ane rata kodjo i Masehi, sangaja<sup>2</sup> da nalapasaka kita ri pepoeëta ri To Roma, i Masehi da tapodatoe mangkekeni wa'a nto lino, pai nakabangke ngkateto'ota kita To Jahoedi. Ri kadjela i Masehi tongawa banja bara da ndapare'e kanga'a ngkatoewoe nTo Jahoedi; ma'i Sira mantjompo sala nto lino ri Poeë Ala, nakajoa moeni ndjaja ntaoe ri Sira sindate. Ntje'e anoe bare'e napokono nTo Jahoedi, masae<sup>2</sup> naapepatemo i Masehi.

Kadjela i Masehi ri wawo lino, i Isa to'oa; ntje'e pai tapampapoto'omo Sira: i Poeë Isa.

Lawi ndaintjani i mPoeë Isa kasiranja i Masehi, paikanja bare'e ndato'o<sup>2</sup> mpajoa ri taoe. Maka ane ndato'o mpajoa, maria taoe da sala paloeloenja Sira, maka da napomata<sup>2</sup> dja da kafeosoenja ri pepoeë ri To Roma. Ane nadongemö ntaoe noentoea, ane nakita koeasaa mampaka'osa taoe madjoe'a, da manoto ngkalionja ri rajanja kasiranja i Masehi kodjo.

Nato'omo i mPetoeroe: Komi i Masehi, ana i mPoeë Ala. Pai ri soeara i ngKajapa ri wengi ngkapatea, ndapakanotomo i mPoeë Isa: Jakoemo Ana mPoeë Ala.

Koro mPoeë Isa sangaja<sup>2</sup> koro ntaoe ewa korota; maka maoro Sira, maranganga, woesoe jore, mawowe rajaa; ndaintjani mawongko raja; ndaintjani motoemangi. Ane ndabobaki, madjoe'a ndaepe.

Wa'anja posisala mPoeë pai kita, maka bare'e re'e denggo bara dja'a ri Sira. Magali rajaa, ewa raja mPoeë Ala. Napeboetoeka i Madja'a malingoeni rajaa, da ndapantali-koesi Poeë Ala, da ndapaloeloe djaja nto lino, pai bare'e ndapokono i mPoeë Isa maloeloe paoe i Madja'a. Raja i Madja'a, naka ne'e mewali sala nto lino ndaosoe mPoeë Isa.

Maria ngaja paoe mporapa ndato'o i mPoeë Isa, anoe kono koroa, nakanoto ndaja ntaoe gori jowe ngkama'ia. Ndato'o: Jakoemo kadjoe anggoro anoe montjo, pai komi taoe meaja ri jakoe, ra'anja. Posokinja: Podo taoe anoe mekekeni mainti<sup>2</sup> ri Poeë Isa da maroso katoewoenja; ewa ra'a ngkadjoe anoe toewoe dja ri pombekentanja pai wotonja.

Ndato'o wo'oe: Jakoe to pongkambi anoe montjo. Posokinja: Wa'anja i Poeë Isa anoe maintjani mangkariani taoe nakadago kodjo ngkatoewoenja.

Ndato'o wo'oe: Jakoemo djaja anoe montjo, jakoe anoe mampatoewoe taoe. Posokinja: Wa'anja Sira anoe maintjani mawawanaka taoe rata ri Poeë Ala; wa'anja Sira anoe saroe ngkoro mPoeë sindate; wa'anja Sira anoe mampatoewoe raja ntaoe pai angga ntaoe.

Ndato'o wo'oe: Jakoemo silo nto lino. Maka wa'anja Sira anoe mampapenaa, mampakareme raja ntaoe, pai tapangkitja i Poeë Ala, pai naka bare'e tasaja djaja ri Sira.

Tongawa ndjairia banja taoe woengka eo Sira, sangaja<sup>2</sup> ana mPoeë Ala. Ri Poeë Isa ndapampamara i mPoeë Ala koroa ri to lino. Kabangke ngkatoewoe mPoeë Isa ri wawo jangi ndapalaika, nepa mena'oe ri lino. Mala'eka samba'a djela manto'oka i Maria da poananja, koeasa

mPoeë Ala anoe da mampare'e ananggodinja. Tongawa wo'oe ka'i-Poeë-Alaa, maka bangke kodjo koeasaa: saloemboe taoe madjoe'a ndapaka'osa, podo ndadjama bara ndaseko; montjowoe taoe ndapakoni, podo sakodi roti; melindja Sira ri wavo oeë.

Ka-Ana-mPoeë-Alanja Sira pai naka bare'e lioe<sup>2</sup> mate Sira. Roo napatepe ntaoe, toewoe moeni Sira ri reme katatogo oengka ri kapatea. Pai bare'e tasaja katoewoea moeni se'e, maka ri kapatea poeramo kodjo raja noe ana goeroea, nasajamo kasiranja Ana mPoeë Ala. Ri katoewoea moeni, manotomo raja ntaoe se'e pai nakandjo'oe mangkeni Noentoe ngKatoewoe. Poesamo 40 mbengi oengka ri pembangoea moeni, malaimo i Poeë Isa, mewalili ri kare'ea owi, ri Poeë Ala, ndakekenimo moeni lanti bangke, anoe lawi anoe kabare'epanja mena'oe ri wavo lino.

Ntje'e pai nakare'e alima eo mposoesa ri kita To Masehi. Sandeme be bali<sup>2</sup> kakononja ri reme 25 woeja December. Tato'omo: Eo Bangke si'a, maka taendo<sup>2</sup> reme mpampoana i Poeë Isa. Oengka ndjairia reme ngkapate mPoeë taendo<sup>2</sup> ri woeja Maart bara ri woeja April; sangaja<sup>2</sup> kono ri reme Djoemaat.

Poesa roea mbengi taendo wo'oe Katoewoe moeni i mPoeë Isa, roeandeme kakononja. Poesa wo'oe 40 mbengi mooemapo wo'oe kita sandeme, maendo Pepone mPoeë Isa ri wavo jangi. Sangaja<sup>2</sup> kono ri eo Kamis. Nepa poesa wo'oe sampoejoe ndeme re'e wo'oe posoesa maendo Pena'oe Inosa mPoeë Ala.

**POMPEOASI:** Wa'anja i sema anoe mangkoto maosoe salata? I sema manto'o da kadjela i mPoeë Isa? I sema to'o lantia? Makoedja pai napampepatemo nTo Jahoedi Sira? Makoedja bare'e ndato'o<sup>2</sup> kasiranja i Masehi? Rimbe'i panto'oa mpajoa kasiranja ana mPoeë Ala? Waimbe'i koro mPoeë? Ndjaa posisalaa pai kita taoe woengka eo? Waimbe'i sa'e gori mpampapoto'oa koroa? Rimbe'i wo'oe tongawa

kasiranja ana mPoeë Ala? Makoedja bare'e tasaja katoewoe moeni i mPoeë? Oengka lairia imbe'i palaia? Imbambo wa'a ndeme mposoesa nTo Masehi.

### 9. Pompageoeroe i mPoeë Isa.

Kadjela i mPoeë ri wavo lino, da tapaintjani i Poeë Ala Poeë ntana pai oeë, Papata. Pai rata i Poeë Isa mantjompo salata, nakadago kita ndapoana moeni i mPoeë sindate.

Maria toentoe i mPoeë anoe mampakanoto rajata gori ngkatoewoe i mPoeë Ala. Madago kodjo wa'a ntoentoe se'e, maka lioe<sup>2</sup> oengka ri Poeë Ala pangkenia. Noentoe se'e anoe manto'oka kita wo'oe kadago ngkatoewoe anoe ndawaika kita i mPoeë Ala.

Anoe ma'i ndawangoe i mPoeë Isa, ntje'emo Poparenta i mPoeë Ala, bara Poparenta nTjoeroega to'onja pai Sira anoe datoer ri poparenta setoe. Mokole nto lino masongka<sup>2</sup> pobanoeata, podjaja pai podjamaata, ntje'e anoe mawanaka kita nakabangke ngkatoewoe ngkorota, paikanja i Poeë ma'i mamparenta pai mampajoa rajata.

Poparenta i mPoeë Ala anoe ri wawonja, napariara poparenta ntaoe. Ntje'emo anoe ndapaporapaka i mPoeë Isa ewa woejawa anoe nasoinbo ntaoe ri tana; narata ntjamba'anja, napobaloe anoenja poera<sup>2</sup>, naoli tana setoe. Bara ewa matia anoe ma'ai ngkadolidi; narata ntaoe, napobaloe anoenja poera<sup>2</sup>, naoli matia setoe.

Ndato'o wo'oe gori ngkatoewoe mpoparenta i mPoeë se'e, maka kodi si'a ri pontepoe'oenja, ewa woekoe nambo, paikanja masae<sup>2</sup> bangkemo. Maka ri kapate i mPoeë bare'epa maria taoe meaja ri Sira. Wawase'e bare'emo ndaintjani imbanja, karia ntaoe anoe mesoeamo ri poparentaa.

Ndato'o wo'oe mbe'i anoe da mesoea ri poparentaa, maka sangadi tabalisaka rajata, taaja kodjo Poeë Isa, nepa tale'o mesoea.

Sangaja anoe ndapakanotoka kita: Kapoeroe ndaja mPoeë Ala ri taoe masala. Ndapaporapaka taoe masala ewa bimba anoe tetadji, maka lingoe raja, pai ewa doi santoebi anoe tetadji. Kobelaanja naepalimo ntoempoena, rantani narata moeni. Ewase'e pampepali mPoeë kita taoe anoe tetadji, anoe masala. Bara ewa ananggodi mampalaika papanja. Montjosimo moeni raja, mewalili, ma'ai kawongko ndaja mPapanja. (Loek. 15.)

Banja podo ri ngoedjoe wa'a mpatoedjoe mPoeë, paikanja ri katoewoea be ndaowe<sup>2</sup> mampepali taoe masala, taoe kodi anoe naposari noe joenoenja; bare'e poera kapoeroe ndajaa ri taoe madjoe'a; ananggodi ndadontjo tanoananja. Maria ngkani ndato'o mPoeë: Anoe koekama'ika ri wawo lino se'i, mampepali anoe tetadji. Ewa we'a bare'e toemoro katoewoenja ri banoea i Simo, anoe ndapokoeroe i mPoeë Isa. (Loek. 7:36-50). Ewa i Sakeoe to peroeroe asele, anoe ndapokapoeroe i mPoeë, pai naka bare'emo napobangke doi. (Loek. 19:1-10).

Bare'e ndaowe<sup>2</sup> i mPoeë manto'oka taoe da mantadji anoe maga'a raja, pai Poeë Ala. Ewa rapanja ngalitaoe kore'e anoe ma'ai gaga pampomawonja doinja, pai naka bare'e narata mpodago Poeë Ala.

Wa'a mpandita pai goeroe pai mokole nTo Jahoedi maria ngkani ndapodjangai, kabare'enja napokono meaja ri Sira. Pai sangaja<sup>2</sup> manee rajaa mampompaoeka taoe setoe, maka ndaintjani i mPoeë da bangke kaparinja raneo.

Re'e 12 ana goeroe i mPoeë Isa anoe bare'e mog'a pai Sira. Tae setoe ndapagoeroe saeo saeo. Maka lawi ndaintjani i mPoeë, bare'e da masae katoewoea ri wawo lino, paikanja ana goeroea da mamparataka taoe Noentoea poera<sup>2</sup>.

Banja podo ri ngoedjoe patoedjoe i mPoeë. Bare'e

mosisala katoewoea pai patoedjoea. Ntje'e pai tapampopandiri Sira. Pagonja ri kapari ngkatoewoe mPoeë, ri pampakoe ntaoe koroa ri kadjoe, tongawa kabangke ndajaa anoe tapopandiri wo'oe.

Maka ndapekakaika taoe madjeani Sira. Ndatodosaka djoe'aa mampepewoloka kapari ndaja ntaoe; maka ndatoedjoeka i Johane inea, da napagampi; taoe masala samba'a ndadjandjika da sangkani<sup>2</sup> katoewoenja pai Sira ri Soeroega.

Rodo sangkani rajaa ri kadjoe mantandje Papata Sindate, rantani poera inosaa, ndatima i mPoeë Ala.

**POMPEOASI:** Ndjaa ndakama'ika i mPoeë ri wawo lino? Ndjaa nato'oka kita ntoentoe i mPoeë? Ndjaa ma'i ndawangoe i mPoeë? Ndjaa posisala mpoparenta mPoeë Ala pai' poparenta ntaoe? Mbe'i anoe bangke ri radoea se'e? Ndjaa ndapaporapaka kabangke mpoparenta mPoeë Ala? Waimbe'i kateranga<sup>2</sup>ni kabangke mpoparenta se'e? Waimbe'i da pesoetata ndjairia? Waimbe'i popagoeroe mPoeë manto'o kapoeroe ndaja mPoeë Ala? Bara tongawa wo'oe kapoeroe ndaja i mPoeë Isa ri taoe? Isema ndapodjangai i mPoeë? Makoedja pai naka re'e ana goeroea? Da tapokoedja wo'oe i Poeë? Rimbe'i tongawa mpodago kabangke ndajaa? Waimbe'i gori ngkabangke ndajaa?

#### 10. Kateosoe ntjalata.

To'o ngkoroi mPoeë: Isa, posokinja: Tadoe ngKadago. To'o lantia: i Masehi, posokinja: Anoe ndaboeboeka lana ri tanoananja. Maka tatogo taoe ndalanti anoe ndaboeboeka lana ri wawo ntanoananja: Tadoe mpanjomba bangke, Nabi pai Datoe.

Lawi taintjani: to lino be rodo rajañja pai bare'e maroso katoewoena. Maria salanja pai nakawase'e. Raja mPoeë da mampakarodo moeni rajata, pai bare'e ntaninja djajanja, da mampakarodo rajata.

Re'e wo'oe djaja ntaoe toe'ata nakajali sala ntaoe, ntje'emo moandoe sala, pai mantjepa panga. Paikanja djaja setoe podo rapa, djaja anoe napare'e ntaoe. Ane mantjepa panga kita ewa merapi poeroe, maka maoe taga'amo panga, bare'epa manoto bara ndaaja i mPoeë, bara bare'e.

Katoedoe mPoeë Isa tepakoro djaja mPoeë Ala, maka Sira anoe mampokaoe anaa. Kapate mPoeë pai nakajalimo ntjala nto lino anoe meaja ri Sira. Ane bare'e ndawai mPoeë Isa da napepate ntaoe koroa, bare'e wo'oe da mewali da napepate. Maoe dja mesamboeni i Poeë, be da re'e taoe male'o Sira. Ane ndapompaoeka taoe sondo anoe mampomawo Sira, sangaja<sup>2</sup> da meewa taoe se'e. Ane merapi i Poeë Isa petoeloengi mPapaa sindate, da opi ntjoroba wa'a ntaoe madja'a ri Sira. Paikanja lawi raja i mPoeë da mate mantjompo sala nto lino.

Kita taoe woengka eo bare'e takoto mantjompo sala ntaoe; maka kita se'i re'e wo'oe salata. I Poeë Isa pai ndapangkoto mantjompo salantolino, maka bare'e re'e salaa.

I Poeë Isa mawalisaka to lino, maka ri kapoeranjamo ndasombo salata, ewa taoe da wo'oemo kita, banjamo watoea i Madja'a kita, anoe maloeloe songkanja, paikanja ana mPoeë Ala katoewoeta, mampedongeka anoe ndato'o.

I Poeë Isa Tadoe ngkadagota. Taoe toe'ata re'e wo'oe tadoenja anoe mamperapika taoe madjoe'a tanoana ri Poeë Jangi. Paikanja sangaja<sup>2</sup> rapa setoe; kamontjonja bare'e ndekoe tadoenja, bare'e naperapika kita dago. Wa'anja anoe tadoe ngkadago kodjo, ntje'e i Poeë Isa. Sira mangaworoka kita djaja ri Poeë Ala.

I Poeë Isa mampakadago moeni kita pai Poeë Ala. I Poeë Ala bare'e madja'a raja ri to lino; maoe bangke salanja, sangaja<sup>2</sup> ndapomawo dja. Dja to lino anoe madja'a ri

Poeënja, poe'oe ngkatoewoena. Ntje'e pai naka djelamo Sira manto'oka to lino: Ndiowemo meewa ri Poeëmi; ne'e boi ndito'o: bare'emo ndapokono mPoeë Ala kami, kabangke ntjala mami; maka se'i Jakoe mangkojo salami; komi dja ndikandjo'oemo.

I Poeë Isa wo'oe nabita anoe ri wawonja mpodago. Maka anoe ndato'o Nabi, ntje'e anoe mampetemboeka taoe paoe anoe bare'e nadonge ri taoe, bara nabasa ri soera, paikanja anoe sambela<sup>2</sup> ri Poeë Ala padongenja. Pai wa'a noentoe anoe ndakenika kita i mPoeë Isa, lioe<sup>2</sup> oengka ri Papaa sindate pangkenia. Maka nepa ri kadjela i mPoeë Isa padonge nto lino paoe anoe ewase'e.

Poera<sup>2</sup> taoe anoe meaja ri Poeë Isa, sangaja<sup>2</sup> da me'oeroe ri Sira. Ntje'e pai tapampodatoe i Poeë Isa, Datoe mpoparenta mPoeë Ala. Wa'a Datoe ri lino nape'oeroe mpalilinja, maoe madja'a rajañja ri Sira. Bare'e maja taoe me'oeroe ri Poeë Isa ane bare'e maboeja rajañja ri Sira.

Ri kapate i mPoeë Isa re'emo paoea: Poeramo koenangi wa'a nto lino poera<sup>2</sup>. Maoe bare'epa mewali mpodago paoe se'e, takitamo kamontjonja, maka ri kapate mPoeë podo sa'e raja ntaoe me'oeroe ri Sira; wawase'e mariamo, pai ri poerinja to lino poera<sup>2</sup> da maintjani Sira.

**POMPEOASI:** Ndjaa posokinja: Isa? Ndjaa posokinja: i Masehi? Ndjaa toendainja pai nakarodo moeni ndaja ntaoe? Ndjaa djaja ntaoe toe'a da nakajali ntjala? Ndjaa djaja mPoeë Ala pai nakajali ntjala ntaoe? Waimbe'i kapate i mPoeë Isa, bara songka ntaoe pai naka mate Sira, bara lawi rajaa? Makoedja pai ndapangkoto i mPoeë Isa mantjompo salata? Waimbe'i pewali nto lino ane roomo ndasombo i mPoeë salanja? Taoe toe'ata bara re'e wo'oe tadoenja? I sema Tadoe ngkadago anoe montjo? Waimbe'i pampakadago mPoeë Isa to lino pai Papaa? Makoedja pai tapanto'o i Poeë Isa Nabita? Waimbe'i kadatae i mPoeë Isa? Noendjaa ndanangi mPoeë?

### 11. Peaja ndaja.

Kadjela i mPoeë Isa ri wawo lino se'i, poeramo ndaosoe sala nto lino poera<sup>2</sup>. Paikanja sangadi kita meaja kodjo ri Sira, nepa da mewali salata ndajali. Ane bare'e tamekekeni ri Tadoe ngKadagota, bare'e re'e jowe ngkadjelaa ri kita, sangaja<sup>2</sup> metaka dja salata ri korota.

Bare'e ndaowe<sup>2</sup> i mPoeë manto'oka taoe ntongo toewoe ri wawo lino: Aja jakoe. Ane bare'e gana peaja ndaja ntaoe, sangaja<sup>2</sup> ndapodjangai, ewa pampodjangaia ana goeroea anoe maeka raja, ntongo modoeanga marimbo ngojoe pai ropo (Soera L. i mP. Isa, No. 29, Loekasi 8:22-25). Taoe madjoe'a ane naaja Sira, sangaja<sup>2</sup> osa djoe'anja, ewa ananggodi ntaoe ri Kapenae ndapaka'osa mPoeë, maka meaja kodjo papanja ri Sira (Soera L. i mP. Isa, No. 14); ewa ananggodi mate woela; maka ndato'o i mPoeë Isa ri papanja: Sangadi noeaja jakoe, nepa koekoto mampakadago anamoe. Pai napesono mpapanja: Koeaja komi, Poeë, ndipakaroso rajakoe, naka montjo aja ndajakoe ri komi (Soera L. i mP. I., No. 38, Loek. 9:37-45).

Ri pompaoe mPoeë Isa pai we'a nTo Kanani, maka naperapi da napakadago mPoeë ananja, ndaoende aja ndajanja ri Sira, pai naka'osa ananja (Soera L. i mP. I. No. 36).

Ane meaja taoe ri Sira, salanja ndapakapaja; ewa taoe poengkoe anoe ndaoejoe oengka ri ata banoea kare'e mPoeë. Maka ndato'oka taoe setoe: Salamoe ri Poeë Ala koeso-mpokamo siko (Soera L. i mP. I. No. 18, Loek. 5:17-26). We'a masala wo'oe anoe rata malanai witi mPoeë Isa, ndato'oka: Majalimo salamoe. (Soera L. i mP. I. No. 25, Loek. 7:36-50).

Ane bare'e naaja ntaoe Sira, bare'e ndakoto mampaka'osa taoe madjoe'a, ewa ri kandjo'oea ri lipoe Nasare, bere'e taoe ndapakadago (Soera L. i mP. I. No. 32, Loek. 4:14-32). Ane bare'e naaja ntaoe Sira, bare'e ndakoto i mPoeë mampakadago katoewoenja.

Ana goeroe mPoeë se'e sangaja<sup>2</sup> nato'oka taoe: Aja i Poeë Isa i Masehi. Ewa taoe nalanti i Datee Kandake mampeoasi ri Pilipoe: Bare'e madago jakoe da noerioe? Mesono i Pilipoe: Ane manoto rajamoe maaja i Poeë Isa, madago koerioe siko. (Soera L. i mP. I. No. 85; Soera Laolita'wa'a ana goeroe 8:26-40). Kanapeoasi nTadoelako ntaroenggoe ri lipoe nTo Pilipi ri Paoeloe: Poeë, noendjaa da koepowia, da koeparata rodo ndajakoe? Mesono i Paoeloe: Ajamo Poeë Isa (Soera L. mP. I. No. 91; Soera Laolita wa'a ana goeroe 16:12-40).

Ane meaja kita ri Poeë Isa, bare'e tasaja kasiranja Ana mPoeë Ala, anoe ndapokaoe rata ri wawo lino mangantjompo sala ntaoe; bare'e tasaja kamontjo noe wa'a noentoe pai songka anoe ndato'o. Ane montjo peaja ndajata, wa'anja Sira tatandje ri katoewoeta pai kapateta. Tapakaboeja sangkani rajata ri Sira.

Ane meaja kita ri Poeë Isa, sangaja<sup>2</sup> da tapokasangkompo Sira. Oengka ndjairia joa ndaja i mPoeë tapokajoa ndaja. Wa'a ntjalata bare'emo ndakitanaka mPoeë Ala. Ndato'oka kita: Kamontjonja da koehoekoe komi, karia ntjalami; paikanja paajami Anakoe anoe bere'e salanja, pampokasangkomponi si'a pai pampokajoa ndajami wo'oe kajoa ndajanja, ewa taoe bare'e masala siko.

Ane tapokasangkompo i Poeë Isa, kita wo'oe ndapoana i mPoeë Ala. Wa'anja ntje'e djaja da pampakadago mPoeë Ala kita. Mae tapokapoeroe kodjo joenoe, tapakadojo mominggoe, maoe takekeni Noentoe ngKatoewoe, paikanja ane bare'e montjo peaja ndajata ri Poeë Isa, sangaja<sup>2</sup> metaka dja salata ri korota.

**POMPEOASI:** Sangadi wenoe kita nepa da majali salata? Bara ndapodjangai i mPoeë Isa ana goeroea kabare'enja gana peaja ndajanja ri Sira? Taoe madjoe'a anoe ewambe'i raja, ndakoto i mPoeë Isa mampaka'osa? Taoe waimbe'i anoe ndakoto mPoeë majali salanja? Ane bare'e

meaja taoe ri Poeë Isa da wenoë? Ndjaa anoe nato'o noe ana goeroe mPoeë Isa ri taoe sondö? Ndjaa posokinja: meaja ri Poeë Isa? Tapokoedja i Poeë Isa ane meaja kita ri Sira? Ndjaa djaja mpajali salata ri Poeë Ala? Bara re'e djaja ntaninja da ndapakadago i mPoeë Ala kita?

## 12. Katebalisaka ndaja.

Ane meaja kodjo kita ri Poeë Isa, bare'e tapodjo mantalikoesi Poeë Ala, sangaja<sup>2</sup> tadtadoe Sira.

Ane meaja kodjo kita ri Poeë Isa, bare'emo da tapokono mampakoro denggo ndajata, bare'emo tapokono manawa<sup>2</sup> anoe madja'a, bare'emo tapokono maloeloe djaja anoe banja oengka ri Poeëta. Ntje'emo anoe ndato'o: Katebalisaka ndajata, nTongo bare'epa ntani maboeja rajata maloeloe songka mPoeë, se'i ndabalisakamo rajata pai tapampoo-konomo.

Kabare'enja napokono ntaoe mantadji denggo ndajanja, pai naka bare'e mewali katebalisaka ndajanja. Ri pontepoe'oeta mabalisaka rajata, taendo rioenja salata. Podo ane taepemo kodjo kanee ntjalata, nepa montjosoi rajata. Ewa i Mqkole Daoedi ri kanaepenja, salanja mangasago we'a ntaoe, ma'ai pontjosoi ndajanja (Soera L. nTaoe Piamo, No. 67). Ewantje'e i Petoeroe, kanaepenja salanja mantjapoe pangaloeloenja i Poeë Isa; malai si'a ma'ai potoemanginja (Soera L. i mP. I., take 119; Loek. 22: 54-61).

Oengka ndjairia mewalilimo kita ri Poeë, tato'oka i Poeë salata ri pekakaita, nepa da taperapi kapoeroe ndaja i mPoeë, ne'emo da ndakitanaka salata. Ntje'e anoe ndapakanotoka kita i mPoeë ri Noentoe mPorapa: Ananggodi mampalaika papanja. Maka nato'oka papanja ri pewalilinja: Papa, masala jakoe ri Poeë Ala pai ri komi;

bare'emo madago jakoe da toewoe anami (Soera L. i mP. Isa, No. 48; Loek. 15: 11-32).

Mosisala kodjo katoewoe ntaoe anoe tebalisakamo raja, paianoe bare'e. Ntje'e paindapampapoto'o katoewoe ntaoe anoe ewantjetoe: Pampoana karoea ngkaninja, bara pampoana da wo'oe, anoe banja kono korota, anoe da kono rajata. Ewa poeramo ndapakanoto i mPoeë ri Nikodemoe: Ane bare'e ndapapo'inosa moeni mPoeë raja ntaoe, bare'e da mewali ana mPoeë Ala si'a (Soera L. i mP. I., No. 12).

Mosisala wo'oe pontepoe'oe ngkatebalisaka ndaja ntaoe. Sa'e masae pampepalinja da kanoto ndajanja, nepa manoto. Ewa roo ndato'o i mPoeë ri Noentoe mPorapa: Taoe anoe mampepali matia anoe bangke olinja (Soera L. i mP. I. take 47). Ewa i Natanae anoe bare'e napokono rioenja maaja i Poeë Isa (Soera L. i mP. I., take 17). Sa'e wo'oe manoto ntjoroba raja, ka'i-Poeë-Isanja Ana i mPoeë Ala. Ewa i Paoeloe anoe ndabalisaka ntjoroba raja, ri pelindjanja ri Damasi. (Soera L. i mP. I., no. 84, Soera Laolita wa'a ana goeroe, 9 : 1-9.) Ewa ndato'o i mP. Isa ri Noentoe mPorapa: Taoe marata ntjoroba woejawa ri ra ntana (Soera L. i mP. I., take 47).

Kadagonja kodjo ane ronga natoedjoeka kita noe ineta bara papata djaja ri Poeë Ala, ntongo mangoera dja kita, maka ane ewase'e, ronga tebalisaka rajata, ane bangkemo kita.

Anoe mampakatebalisaka rajata, ntje'emo Inosa mPoeë Ala, anoe mesoea ri rajata. Oejoe mpena'oe Inosa mPoeë Ala, 10 mbengi oengka mpepone i mPoeë Isa, monoentoe i Petoeroe, pai nakanoto ndaja ntaoe 3000 (Soera L. i mP. Isa, No. 79; Soera Laolita wa'a anagoeroe, 2).

Oengka ndjairia bare'e ndaowe<sup>2</sup> Inosa mPoeë Ala mampakanoto raja ntaoe; djajanja ri padongeta Noentoe ngKatoewoe. Maka ri padonge<sup>2</sup>ta Noentoe ngKatoewoe, ndalike<sup>2</sup> noe Inosa mPoeë Ala rajata da tapaaja.

Sa'e taoe bare'e naepe roso noe Inosa mPoeë Ala, pai

naka bare'e tebalisaka raja. Poe'oenja pai nakawase'e maka taoe setoe lawi bare'e napokono meaja ri Poeë Isa. Sa'e bare'e mampokono, maka pobangke<sup>2</sup>nja; panto'o ndajanja nakotomo ngkalionja mampakadago katoewoena. Sa'e bare'e mampokono, maka bare'e napodjo mantadji adanja anoe modenggo. Sa'e bare'e napodjo meaja ri Poeë Isa, maka maranindi raja, nato'o: Podo kabangke ngkatoewoe ri wawo lino koepepali; i Poeë Ala bare'e koeintjani.

Ne'e wo'oe tato'o: Pai naka bare'e tebalisaka rajakoe, maka bare'epa rata Inosa mPoeë Ala ri jakoe. Maka bare'e tapakoroka rajata pai naka wase'e. Raja ntaoe sa'e ewa djaja mapeni, sa'e ewa tana kelee, sa'e ewa tana keroka, sa'e ewa tana madago (Soera L. i mP. I, No. 27; Noentoe mporapa nTaoe Mompaho, Loek. 8 : 4-15). Paikanja maoe taoe anoe madja'a mpodago, sangaja<sup>2</sup> ndakoto Inosa mPoeë Ala mabalisa raja.

Mewali dago ngkatoewoe podo oengka ri Poeë Ala kama'inja. Sira wo'oe anoe mampeboo kita poera<sup>2</sup>, pai kita ndjo'oe ri Sira ane majoa rajata. Sa'e to lino ndjo'oe madadoe Poeënja, sa'e bare'e napokono ndjo'oe. Ntje'e pai tapanto'o: i Poeë Ala da mampilisi taoe anoe ndapakadago pai anoe bare'e ndapakadago.

**POMPEOASI:** Ane meaja kita ri Poeë Isa da ewambe'i rajata? Waimbe'i katepoe'oe ngkatebalisaka ndajata? Ane roomo tapontjosoi salata, da waimbe'i wo'oe? Bara mosisala katoewoe ntaoe anoe tebalisakamo raja. Pai anoe bare'epa? Wambe'i pewali ngkatebalisaka ndaja? Taoe mbe'i anoe da ronga tebalisaka raja? Noendjaa mampakatebalisaka rajata? Waimbe'i tetala Inosa mPoeë Ala ri rajata? Makoedja be napodjo ntaoe sa'e meaja? Bara sala noe Inosa mPoeë Ala pai naka bare'e tebalisaka raja ntaoe se'e? Taoe anoe madja'a kodjo, bara be da ndakoto Inosa mPoeë Ala mabali raja? Wambe'i gori mpampakadago mPoeë Ala to lino?

### 13. Katoewoe anoe magali.

Ane taaja kodjo i Poeë Isa, bare'emo mokoeasa i Madja'a ri rajata. Maka rajata se'e bare'emo napearl noe nawa<sup>2</sup> anoe madja'a, paikanja podo nawa<sup>2</sup> anoe oengka ri Poeë Ala tapakoro ndjairia. Ane taajamo i Poeë Isa, manoro tilamo mPoeë Ala sindate kita.

Kakomaroso<sup>2</sup> peaja ndajata ri Sira, kakobangke<sup>2</sup> kamawo ndajata ri Sira, kakomontjo<sup>2</sup> paloeloeta songkaa, kakosasawia katoewoeta pai katoewoe ntoekakata i Poeë Isa.

Mewali ane meaja kita ri Poeë Isa, ndapakagalimo rajata, pai sangaja<sup>2</sup> tongawa kagalinja se'e ri katoewoeta woengka eo. Ane madja'a<sup>2</sup> pompaoeta ntongo i owi, wawase'e dja paoe montjomo tapaoe. Ane magasi kita mopaiso ntongo i owi, da maloeloe<sup>2</sup>mo rajata ri joenoe wawase'e. Ane sengke<sup>2</sup> ntongo i owi, wawase'e da tapakarodomoo rajata ri joenoe. Bara madja'a gaoeta ntongo i owi, wawase'e djamo kapoeroe ndajata ri joenoe anoe mampapolengko paleta pai witita. Ane ewase'e, nepa montjo kagali ndajata.

Taoe meaja ri Poeë Isa napari<sup>2</sup> dja naka sawia raja. Pai raja mPoeë Ala. Ntongo re'e dja sengke<sup>2</sup> nja, ntongo re'e dja kasina ndajanja, ntongo re'e dja mbambanja, bare'epa maja da rodo si'a, ntongo mapari<sup>2</sup> dja. Ane naowemo mapari<sup>2</sup>, bare'e re'e jowenja peaja ndajanja.

Pai bare'e wo'oe montjo tapobangke<sup>2</sup>ka paloeloeta songka i mPoeë Ala. Banja bara taoli kaboeja ndaja i mPoeë ri paloeloeta songkaa. Maka maoe rapanja, taloeloe songka mPoeë poera<sup>2</sup>, banja wo'oe bara da ndaoende i mPoeë kita. Ewa panto'o i mPoeë ri Noentoe mPorapa: Ama majoenoe maloeloe songka mPoeënja, bare'e bara da naoende ana majoenenja setoe. (Loek. 17 : 7-10.)

Bangke posisala ntaoe anoe maloeloe songka mPoeë Ala

ri kaekanja, pai taoe anoe maloeloe songkaa ri pampotowenja Sira. Taoe anoe maloeloe ri kaekanja, napomapari maloeloe songka; ewa ana majoenoe maloeloe songka mpoeënja, sangaja<sup>2</sup> mapari naepe. Ane kamawo ndajata pai tapaloeloe songkaa, manga'a jaoe, maka lawi sawia rajata pai raja mPoeë sindate; mewali. ewa paloeloe ananggodi songka mpapanja pai inenja, bare'e napomanee. Maka taoe setoe sangaja<sup>2</sup> nakadoedoengi wo'oe Inosa mPoeë Ala.

Taoe anoe meaja ri Poeë Isa sangaja<sup>2</sup> re'e wo'oe totonja, maka maria iwalinja. Sa'e iwalinja joenoenja anoe mangkelo<sup>2</sup> si'a naka ne'emo naloeloe songka mPoeë. Sa'e iwalinja i Madja'a anoe mampapesoea ri raja nawa<sup>2</sup> anoe bare'e magali, anoe madja'a. Sa'e iwalinja rajanjamo se'e; maka ane lawi sengke<sup>2</sup> si'a, kasengkenja se'e napo'iwalika; ane lawi masina raja si'a, kasina ndajanja napombeloekoeka; ane lawi kambamba<sup>2</sup> rajanja, lopoenga se'e anoe da natodosaka saeo saeo.

Lawi taintjani loseta, maria tengota, mewali sangaja<sup>2</sup> taara<sup>2</sup> mpodago rajata, boi nalingoeni kita, sangaja<sup>2</sup> mainga pelindjata ri katoewoeta, boi re'e joenoeta mawawanaka kita ri djaja anoe banja djaja mPoeë.

Tesajo manawoe taoe anoe meaja ri Poeë Isa, ewa i Petoeroe anoe bangke peajanja ri Poeë Isa, maka nasapoe paloeloenja Sira. Pai bare'e maja taoe anoe ewantje'e da maroo<sup>2</sup> ri kasala ndajanja; bare'e maja mampakapeni rajanja ri Poeë Ala. Ane lawi montjo peaja ndajanja, sangaja<sup>2</sup> da napontjosoi ndaja salanja, da mewalili moeni ri Poeë Ala.

Mewali ane kita meaja ri Poeë Isa, taintjani poeramo salata ri Poeë Ala; paikanja manoto wo'oe rajata bare'epa magali katoewoeta. Sangaja<sup>2</sup> tapari<sup>2</sup> naka terangani joa ngkatoewoeta. Ntje'e pai naka mainga<sup>2</sup> kita,mekakai kita, mombeloekoe kita pai wa'a anoe madja'a, tapakainti posintoewoeta pai Poeë Isa.

POMPEOASI: Waimbe'i raja ntaoe anoe meaja kodjo ri Poeë Isa? Wenoe pai naka sawia<sup>2</sup> katoewoeta pai katoewoe mPoeë Isa? Bara tongawa kagali ndajata? Ndjaa anoe da napari<sup>2</sup> ntaoe ane meaja ri Poeë Isa? Bara madago tapobangke<sup>2</sup>ka paloeloeta sofigka mPoeë? Ndjaa posisala ntaoe anoe maloeloe songka mPoeë Ala ri kaeka ndajanja pai anoe maloeloe ri kamontjo ndajanja? I sema napototoka ntaoe meaja ri Poeë Isa? Makoedja pai naka mainga<sup>2</sup> pelindjata ri katoewoeta? Taoe anoe meajamo ri Poeë Isa bara re'e dja paloeloenja djaja masala? Ndjaa napotetala ntaoe meaja ri Poeë Isa woengka eo?

#### 14. Katoewoe anoe magali (sepenja).

Ane To Masehi kodjo kita, be maja tarampa koeasa mPoeë Ala. Ane tapepali mpengaja<sup>2</sup> pakaeli anoe tadika ri pae naka ronga bangke, ewa banjamo Poeë Ala mampapewalika kita pae, ewa kitamo anoe mampapewali. Madago taperapi oedja pai reme ri Poeë Ala paikanja ane taloeloe ada ntaoe toe'a, banjamo merapi kita, tepakoro tarampmo koeasa mPoeë ewa kitamo mampare'e oedja pai reme.

Ne'emo wo'oe kita mwoerake, maka nato'o ntadoe mboerake ndjo'oe mantima tanoana ntaoe, ewa si'a anoe mampare'e. Marampa koeasa mPoeë Ala setoe, maka pawai mPoeë, bara pantimaa moeni, dja pepokonoa.

Ne'e wo'oe takelo karaoe ndaja mPoeë Ala. Maria taoe manto'o: Jakoe poeramo ndarioe, jakoe tila mPoeë Alamo; mewali sangaja<sup>2</sup> da ndakariani mPoeë Ala jakoe. Oengka ire'i montjo pompaoenja; pai nato'o wo'oe: maoe jakoe mowote ri koro oe'kalaoe nggaranggo, bare'e da natoengkoe jakoe, maka ndakariani mPoeë Ala jakoe; maoe koepodoeanga doeanga anoe majosoe,

be da malodongi jakoe, maka da ndakariani mPoeë Ala; maoe bare'e mobakoe jakoe ri poweloeakoe, bare'e koepomapari, maka i Poeë Ala da mampare'eka jakoe pangkoni.

Poera<sup>2</sup> paoe setoe bare'e montjo, maka re'e wo'oe nawa<sup>2</sup>ta ndawaika kita i mPoeë. Ane bare'e wo'oe moreke rajata, bare'e da ndakoto i mPoeë Ala da mampokapoeroe kita. Podo karaoe ndajaa takelo ri katengota setoe. Sangadi tarata pepa anoe banja katengota mampare'e, nepa bangke raja mPoeë mangkadoedoengi kita.

Pagonja ri kadje'ata da tongawa kamontjo mpekekenita ri Poeë Ala. Ane poeramo ndarioe kita pai metakamo rajata ri Poeë ntana pai oeë, manotomo rajata, banjamo lamoanoe madjeani kita. Djoe'a anoe merata ri kita radoea ngajanja. Sangaja anoe napare'e ngkatengota, ane marameda korota pai lioe<sup>2</sup> ndjo'oe mandioe kita pai tapapewoeika ngojoe maranindi korota, bara wota kita bare'e moronto, sangaja<sup>2</sup> da madjoe'a kita. Kabare'enja gana reke ndajata pai naka re'e ndjoe'a setoe. Ane ta'oamo mojangoe<sup>2</sup>, pai nakadjoe'a mbo'ota pai masae da kekoele kita, sangaja<sup>2</sup> katengota pai nakare'e ndjoe'a setoe. Ane malose kita pai naka bare'e gana pangkonita; oengka ndjairia bare'emo maroso woekoeta, be taowe<sup>2</sup> madjoe'a<sup>2</sup>; sangaja<sup>2</sup> katengota poe'oe ndjoe'a setoe.

Sangaja wo'oe djoe'a anoe banja katengota poe'oenja; djoe'a setoe ndapare'e mPoeë Ala, maka re'e anoe da ndato'oka kita. Ri katoewoeta woengka eo mariä tetala, bare'e kono taendo kasala ngkandjo'oeta. Oengka ndjairia ndadjoe'ani mPoeë Ala korota, naka rodo kita mampepwoloka katoewoeta. Pai ane tapepali katoedoe noe djoe'ata se'e, sangaja<sup>2</sup> tarata: bara ndalike mPoeë Ala rajata, ri pangkalinganita Sira; bara tarata ndaja salata ri joenoe.

Pai ane madjoe'a korota sangaja<sup>2</sup> pepokono mPoeë Ala da tapepalimo pakoeli anoe madago, anoe ndawai mPoeë: maka maria kadjoe anoe madago iranja ndapopakoeli,

bara pelanja, bara woeanja. Maka korota se'e banja kita toempoena, sangaja<sup>2</sup> i Poeë toempoena, mewali da taka-riani mpodago<sup>2</sup>, pai ane osamo, da tapakadago naka ne'e madjoe'a moeni korota, nadjoe'ani ngkatengota.

Maoe madago pakoeli, ane banja oengka ri Poeë Ala, toempoe inosata, bare'e da osa kita. Mewali sangaja<sup>2</sup> da tapakadoedoe mekakai ri Poeë sindate, merapi poeroe. Ri pekakaita se'e, da ndapakaroso i mPoeë rajata. Pai ane maroso rajata, saroë<sup>2</sup> da tanangi djo'e'a ngkorota.

**POMPEOASI:** Ndjaa ndato'o: marampa koeasa i mPoeë Ala? Ndjaa sa'e mangkelo karaoe ndaja i mPoeë Ala? Sangkoedja ngaja djoe'a kono kita? Waimbe'i sa'e djoe'a anoe napare'e ngkatengota? Ndjaa sa'e patoedjoe mPoeë Ala ri djoe'ata? Ndjaa tapepali ri djoe'ata? Ndjaa jowe mpekakaita ntongo madjoe'a kita?

### 15. Pekakai ri Poeë Ala.

Maria djaja ndawaika kita i mPoeë Ala, da mampakaroso rajata ri Sira. Maka ane dja gori<sup>2</sup>nja posintoweoeta pai Poeë Isa, bare'e tapakaroso saeo saeo, sangaja<sup>2</sup> bare'emo da mainti pekekenita ri Sira. Ewa pinamoejata, ane bare'e ndaoedjani, sangaja<sup>2</sup> da makese katoewoenga. Djajanja samba'a: da tabasa<sup>2</sup> Soera mPoeë Ala; maka kakomanoto<sup>2</sup> rajata ri Sira. Samba'a wo'oe djajanja: da tapakadojo mominggoe; se'i tabasa ngkaliota Noentoe ngKatoewoe, se'i tapedongeka wo'oe katoedoenga, naka ne'emo tasaja raja pai pepokono mPoeëta. Sandjaja wo'oe: kita da mangkoni roti, pai manginoe anggoro, da tapakamontjo pampatadoelakota i Poeë Isa. Pai sandjaja wo'oe: mekakai ri Poeë Ala.

Ane mekakai kita ri Poeë Ala, mompaoe kita pai Sira; ne'e takalingani kabangke ngkatoewoea, pai naka me'oeroe kita ri Sira ane mompaoe. Ntje'e pai tapampakoroka potoendata, pekakoreta; tapakaboeta mata, naka bare'e re'e anoe marendosi kita; tapakadago pompaeta ewa mampompaoeka mokoleta; ne'e tasamboenika bara ndjaa<sup>2</sup> ri Sira, maka lawi ndaintjani rajata; lawi papata Sira anoe mawaika kita rasita saeo saeo.

Ane mekakai kita, maja taperapi ngaja<sup>2</sup> ri Sira, anoe da galata pai da gala noe joenoeta. Pai ne'e dja podo merapi<sup>2</sup> kita; saeo saeo da tato'oka i Poeëgori ngkaboe ja ndajata ri Sira, maka be ndaowe<sup>2</sup> mampokapoeroe kita.

Sangaja wo'oe: da taimba ri pekakaita wa'a ntjalata ri Sira pai ri joenoeta; ne'e tasamboenika salata, maoe sangaja. Lawi ndaintjani kandjo'oe ntjalata poera<sup>2</sup>; paikanja pepokono i mPoeë da tawalinto'oka Sira denggota. Maka karoonja taimba salata, nepa madago taperapi kapoeroe ndajaa, naka ne'emo ndakitanaka salata.

Pai sangaja wo'oe ne'e takalingani ane mekakai ri Poeë sindate: sangaja<sup>2</sup> taoende Sira, anoe Poeë ntana pai oeë, anoe mangkekeni inosata poera<sup>2</sup>.

Pandiri mpekakai anoe ndawaika kita i mPoeë ewase'i:

1. Papa mami anoe ndati Soeroega. Montjo i Poeë Ala papata, anoe mapoeroe raja ri kita; paikanja ndato'o i mPoeë Isa: Anoe ndati Soeroega, boi takalingani kabangke ngkatoewoea.

2. To'omi ndapapeawa. Pai tapanto'o ewase'e, maka lawi rajata, da napampakabangke nto lino poera<sup>2</sup> Poeëta.

3. Poparentami da djela ri kami. Maka rajata da nape'oeroe nto lino poera<sup>2</sup> Sira; sangaja taoe anoe bare'epa nadonge Noentoe ngKatoewoe; sangaja taoe anoe nadongemo, paikanja anoe mantalikoesi Poeë Ala.

4. Songkami anoe mewali ri Soeroega, da ewantje'e wo'oe pewalinja ri wawo lino. Maka taoe anoe ri ra nTjoeroega bare'e malewa<sup>2</sup> songka mPoeë; rajata naka ewase'e paloeloe ntaoe songka i mPoeë ntongo maroo-roo ri wawo lino.

5. Pangkoni mami da ndiwaika kami saeo saeo. Maka maoe madojo kita modjamaa, mampepali anoe takatoewoeka, sangaja<sup>2</sup> ane bare'e ndapare'e mPoeë, be da tale'o.

6. Sala mami da ndipakapaja, maka kami bare'emo wo'oe kapomasala wa'a ntjala joenoe ri kami. Maka saeo saeo re'e sala metaka ri kita, ntje'e tapekijali ri Sira. Paikanja be da ndajali mPoeë salata, ane mapeni rajata ri joenoe anoe masala ri kita. (Endo<sup>2</sup> Noentoe mPorapa: Taoe moinda radoea. Soera L. mP. I., No. 39).

7. Ne'e ndiwai raja mami nakelo i Madja'a, paikanja ndipapalaika kami i Madja'a. Maria dja'a lanoe mantolilingi kita, anoe bare'e nakita noe matata; podo Poeë Ala mangkita; be naowe ndja'a se'e mangkelo rajata, da maloeloe djaja masala. Sangaja wo'oe: bare'e gana rosota ane podo kita maewa i Madja'a; ntje'e pai tapampekiroemba ri Poeëta.

8. Maka komitoempoe mpoparenta, toempoe ngkoeasa pai toempoe mpeawa ri wawo lino pai ri ra nTjoeroega, bare'e da re'e kapoesanja. Ami. Ntje'e manto'o: Wa'anja Poeë Ala pontepoe'oe pai kapoera mpengaja<sup>2</sup> ri lino pai ri soeroega; sangaja<sup>2</sup> Sira anoe mampotoempoe.

Pekakai i mPoeë se'e tapopandiri. Pai ne'e podo ntje'e tato'o<sup>2</sup> ane mekakai, maka paoe ndajata ngkaliota da tato'o wo'oe. Ne'e podo ngoedjoeta mompaoe; sangaja<sup>2</sup> rajata anoe meboo ri Sira.

Ane montjo pekakaita ri Poeë Ala, sangaja<sup>2</sup> ndadonge

pamperapita. Pawaia anoe taperapi, podo Sira maintjani mampepewoloka kadagonja pai kadja'anja. Ne'e wo'oe tengo kita mamperokoesi merapi<sup>2</sup>, boi tapomadja'a raneo anoe taperapi se'e. Dja ne'e wo'oe majali ri rajata: i Papata sindate maboeja rajaa ri kita, pai bangke rajaa da mawaika kita anoe taperapi.

Pekakai i Eliese ndapedongeka mPoeë Ala. (Soera L. nT. P., No. 11); ewase'e pekakai i Mokole Manasa ri ra ntaroenggoe (Soera L. nT. P., No. 92); pampedongeka mPoeë Ala pekakai nto lino roo ndapakanoto i mPoeë Isa ri Noentoe mPorapa: Kabosenja anoe bare'e naaja Poeë Ala (Soera L. mP. I., No. 57; Loek. 18 : 2-8).

To'o i mPoeë Isa madago tasabomekakai ri Poeë Ala, ane taperapi anoe lawi ndapatadaka kita i mPoeë Isa; bara Inosa mPoeë Ala taperapi, bara peaja ndaja anoe maroso, bara kapoera ntjalata ri Poeë sindate. Pai ntje'e sangaja<sup>2</sup> da ndawaika kita.

Madago wo'oe tapekakaika joenoeta ri Poeë Ala. I Poeë Isa lawi maria ngkani ndapekakaika kita. ri Poeë sindate. Maka ane majoa rajata ri Poeë Isa, manoto wo'oe pokasangkompota, maboeja wo'oe raja mampekakaika joenoe, anoe naroempa ntjoesa ndaja, bara pepa ngkatoewoe, ri Sira.

**POMPEOASI:** Ndjaa djajata mampakaroso posintoewoeta pai Poeë Isa? Waimbe'i ada mpekakai? Ndjaa tato'o<sup>2</sup> ri pekakaita? Ndjaa da taimba ri pekakaita? Sangaja anoe bare'e madago takalingani ri pekakaita, ndjaa setoe? Waimbe'i pekakai mPoeë pai ndjaa katoedoe ntjamba'a pai samba'a? Tapokoedja pekakai mPoeë se'e? Bara sangaja<sup>2</sup> ndawai mPoeë Ala anoe taperapi? Laolita mbe'i sa'e anoe mampakanoto ri kita pawai mPoeë Ala, anoe naperapi ntaoe? Ndjaa madago tasabo ri pekakaita?

### 16. Wa'a ngkasandaja<sup>2</sup> i mPoeë Isa.

Ane meaja kita ri Poeë Isa, salata poera<sup>2</sup> ndasompoka kita. Oengka ndjairia ada da wo'oemo tapoada, anoe mosisala pai ada ngkatoewoeta owi. Pai naka tepasambaka kita maroo<sup>2</sup> ri lipoe, maka modja'i kita. Lawi poera<sup>2</sup> To Masehi modja'i, pai tapampapoto'omo poromoena: wa'a ngKasandaja-ndaja i mPoeë Isa; ane ri basa Malajoe: Garedja Masehi.

Wa'a ngKasandaja<sup>2</sup> i mPoeë Isa se'e ndapaporapa ewa koro ntaoe: Samba'a wo'onja, ntje'e i Poeë Isa. Nepa maria ngaja wo'oe ri koro se'e; sa'e To Masehi anoe maroso peajanja ndapopale, ndapowiti; anoe bare'e maroso peaja ndajanja ndapowoejoea, ndapokajoepa. Paikanja poera<sup>2</sup> To Masehi ewa santjombori bangke, modja'i si'a poera<sup>2</sup>.

Tesaojo katepasambaka noe wa'a ngKasandaja<sup>2</sup> i mPoeë Isa anoe ri wawo lino se'i ndapaporapa ewa banoea: i Poeë Isa ndaponono, sa'e To Masehi ndaporindi, sae ndapotoeke, ndapokaso.

Sangaja wo'oe rapa manto'o: Katepasambaka nTo Masehi ewa kadjoe samba'a: Wotonja i Poeë Isa, wa'a nda'anja ntje'e kita anoe meaja ri Sira. Bare'e madago ra'a ndaga'a pai wotonja.

Sandjaja<sup>2</sup> wa'a ngKasandaja<sup>2</sup> i mPoeë, Garedja Masehi se'e anoe ri wawo lino poera<sup>2</sup>, maka ane montjo peajata ri Poeë Isa, pai tarata ri tana ntaoe anoe montjo wo'oe peajanja ri Sira, lioe<sup>2</sup> modja'i taepe. Wa'a ngKasandaja<sup>2</sup> mPoeë, Garedja Masehi se'e magali wo'oe si'a, maka bare'e napokono mogalo pai taoe anoe mampepali dja'a, anoe mantalikoesi Poeë Ala; ndapatani kodjo si'a. Garedja Masehi se'e bare'e naintjani toeama bara we'a, anoe toe'a pai anoe mangoera, mokole pai watoea, tabe maboeja, bara taoe maeta pelanja, sawia<sup>2</sup> poera<sup>2</sup>. Podo peaja dájanja ri Poeë Isa pai naka mombekekeni taoe se'e.

Paikanja Garedja se'e bare'e nakita noe matata, maka teseboe ri wawo lino. Maria taoe mekekeni ri Garedja Masehi anoe bare'e montjo peaja ndajanja, paikanja i Poeë Ala maitjani maga'a anoe montjo peaja ndajanja pai anoe bare'e.

Samba'a samba'a lipoe anoe laoe To Masehi, sangaja<sup>2</sup> sandjaja<sup>2</sup>. Ntje'e Garedja lipoe; anoe tapaoe roo Garedja Bangke. Ntje'e pai naka bare'e naowe<sup>2</sup> wa'a nTo Masehi mompasambaka ri banoea mPanjomba, mampedongeka sangkani<sup>2</sup> Noentoe ngKatoewoe, mongajoe sangkani<sup>2</sup> maoende Poeë Ala,mekakai sangkani<sup>2</sup> ri Sira.

Pagonja ri Eo Minggoe da tepasambaka kita. Ri Eo Minggoe katoewoe moeni mPoeë Isa pai napaapoka noe wa'a ngKasandaja<sup>2</sup> mPoeë. Sangaja<sup>2</sup> tapeosaka poera<sup>2</sup> tetala woengka eo, naka tepatani kodjo reme se'e, maka reme mPoeë. Wa'anja tapowia ri eo se'e anoe bare'e ntani mangarendosi rajata mampepwoloka i Poeë.

Radoea wo'oe ada bangke ndapakoro ri ra Banoea mPanjomba, ntje'e moparioe pai mangkoni roti ri Pangkoni i mPoeë. Ane mandioe, da ndatedesika oeë ri wawo ntanoana, ndapaporapaka kagali ndaja, maka poeramo ndawoeso'i mPoeë Isa salata. Ntje'e pai ndapadika ri wawo ntanoana: To'o i mPapa, Poeë Ala, maka ntje'e anoe mampare'e kita, pai mangalengko katoewoeta; nepa to'o i Ana, i Poeë Isa anoe mangasompo salata; nepa Inosa mPoeë Ala, anoe mampakanoto ri rajata wa'a Noentoe mPoeë. Ane mandioe taoe, sangaja<sup>2</sup> napasowa riae paoe gori mpeajanja ri Poeë Isa, pai nadjandji wo'oe mekekeni ri Sira, ne'emo ri lamoia.

Madago taoe ntongo ananggodi dja ndarioe. Ane ewase'e, inenja pai papanja madjandji ri Poeë Ala da mawawanaka ananja ri djaja mPoeë, ane bangkemo raneonja. Ane ngalitaoemo bara ana we'amo, da mo'agama; karoonda mo'agama bare'emo ndarioe, maka roomo, paikanja ndapapesoeari wa'a ngKasandaja<sup>2</sup> i mPoeë Isa, ndapapesoeari Garedji Masehi.

Taoe se'e sangaja<sup>2</sup> na'io ri Banoea mpanjomba peajanja ri Poeë Ala, anoe mampapewali lino pai jangi, pai ri Poeë Isa i Masehi Ana mPoeë Sindate, pai ri Inosa mPoeë Ala. Da nadjandji wo'oe mantadji wa'a denggonja, da napari<sup>2</sup> naka majoa rajaanja, pai da naloeloe i Poeë Isa, ri pepa pai ri dago, bara toewoe, bara mate.

Karoonja ndapapesoeari taoe ri wa'a ngKasandaja<sup>2</sup> i mPoeë Isa, madago si'a mangkoni ri Pangkoni mPoeë. Roti adakoni pai anggoro ndainoe, maendo<sup>2</sup> kapate i mPoeë Isa. Ri pangkonita pai ri panginoeta se'e lioe<sup>2</sup> tapomontjo salata poeramo ndajali mPoeë Isa; tapomontjo i Poeë Isa kasangkompta. Oengka ndjairia maroso moeni rajata maloeloe i Poeë.

**POMPEOASI:** Ndjaa ndato'o: Wa'a ngKasandaja<sup>2</sup> i mPoeë Isa? Bara makoedja rapa mpaoe kono Garedja se'e? Waimbe'i lionja Garedja Masehi? Bara paka To Masehi kodjo anoe ri Garedja Masehi? Ndjaa ndapakoro ri katepasambaka nTo Masehi ri banoea mPanjomba? Ndjaa tapowia ri eo minggoe? Waimbe'i ane mandioe taoe, ndjaa katoedoe noe oeë, ndjaa ndadika ri tanoana, ndjaa ndapangakoei ntaoe mandioe? Waimbe'i taoe anoe mandioe ntongo ananggodipa? Ndjaa nato'o ri pampe-soeari Garedja Masehi? Ndjaa katoedoe mPangkoni mPoeë?

### 17. Katoewoe noe Angga.

Taoe poera<sup>2</sup> anoe meaja ri Poeë Isa, ane mate koronja, sangaja<sup>2</sup> toewoe angganja. Katoewoe nTo Masehi ri wawo lino ewa katoewoe nto posikola: wawase'e ntongo megoeroe dja, pai napomata<sup>2</sup> raneonja da madago katoewoena. Ntongo toewoe kita ri wawo lino, maria denggo maparini kita, maria ngkani manawoe kita, maria roegi pai dja'a

mampakanee katoewoeta. Paikanja ane ri Soeroegamo anggata, bare'emo re'e anoe mangasalempori pe'oeroeta ri Poeëta.

Taoe anoe montjo peaja ndajanja, bare'e napokaeka da mate. Pai naka maeka rajata owi da mate, maka bare'e taintjani Poeë Ala; se'i salata tapokaeka boi ndahoekoe kita. Paikanja ane meajamo kita ri Poeë Isa, salata bare'emo re'e; se'i wo'oe i Poeë Ala tapopapa. Ntongo i owi podo katoewoeta ri lino tapomawo. Se'i<sup>2</sup> manotomo rajata ri Poeë Ala. Siramo tapomawo. Bare'emo re'e anoe tapokaeka.

Ane djela kita, rodo sangkani rajata ndjairia: bare'emo re'e tapomaea, bara tapokaeka, bare'emo re'e tapomapari ndaja. Madago sangkani katoewoeta ndjairia. Da manto'o gori ngkadago se'e bare'e wo'oe nakoto ntaoe; nepa da takita ane djelamo ndjairia. Ewa panto'o i Soero Johane: Se'i<sup>2</sup> kita ana mPoeë Ala, pai bare'epa manoto waimbe'i lio ngkorota raneonja; paikanja manoto rajata ane ri Soeroega kare'eta, sangaja<sup>2</sup> da sawia<sup>2</sup> pai Poeë Ala; maka da takitamo gori ngkare'enja.

Sangaja<sup>2</sup> da djela moeni Poeë Isa bara impia, nepa da ndapakoro poparentaa ri wawo lino, pai da teranganimo kadago ngkatoewoe ntaoe poera<sup>2</sup> anoe maaja Sira.

Paikanja kabare'epanja djela Poeë Isa, Noentoe ngKatoewoe da ndawawa ri to lino poera<sup>2</sup>. Sangaja<sup>2</sup> maria taoe be da napokono meloeloe ri Poeë Isa, maria wo'oe anoe da mampalaika Poeënja, sangaja<sup>2</sup> da re'e po'iwali bangke, da re'e silaka bangke, molindoegi tana, mebote boejoe apoe, maria taoe da mate.

Bare'e da naintjani ntaoe ka'impianja da kadjela moeni mPoeë Isa. Sangkani napeoasi ana goeroea: Bara da ronga ma'i komi mampakoroka poparentami? Mesono i Poeë Isa: Bareë koeintjani manto'oka komi setoe; wa'anja anoe maintjani, i Papakoe sindate. Kadjela i mPoeë Isa sangaja<sup>2</sup> da ma'i ntjoroba; be ndapomata<sup>2</sup>, se'im.

Kadjela mPoeë se'e da ndaga'a taoe, anoe montjo

peajanja ri Poeë Isa, bara podo ngoedjoenja manto'o<sup>2</sup> peaja ndajanja. Maria toentoe i mPoeë anoe mampakano-toka kita poga'a nto lino: anoe da mesoea ri Banoea mPoeë Ala, pai anoe da ndatadji ri kadja'anja. Samba'a toentoe manto'o djala, wa'a baoe banganinja, da ndapilisi, anoe madago ndakoni pai anoe bare'e (Soera L. mP. I., take 47). Samba'a wo'oe Noentoe mPorapa anoe manto'o oeraho ndasawoe ri ojo mpae (Soera L. mP. I., take 45). Ri poga'a ntaoe se'e sangaja<sup>2</sup> ndaole mPoeë bara tongawa peaja ndajata ri katoewoeta woengka eo; maoe magasi kita meboo ri Sira, ane bare'e tapokapoeroe joenoe, sangaja<sup>2</sup> ndapotaoe madja'a kita. (Soera L. mP. I., take 73). Tongawa wo'oe ri Noentoe mPorapa: i Mokole mantilaka ana majoenenja doi, napombejoro-joro. (Soera L. mP. I., take 93).

Ri kadjela moeni mPoeë Isa da madago sangkani katoewoe ntaoe, bemo da re'e dja'a, bare'emo da mombepo'iwalisi taoe, bare'emo da mopaiso; dja da mombepomawo, mombekadago. Poparenta i mPoeë Isa ndapaporapaka ri Soera mPoeë Ala, manto'o lipoe Jeroesale anoe da wo'oe. Ndjairia be naowe<sup>2</sup> ntaoe maoende-oende Poeë Ala.

**POMPEOASI:** Bara toewoe dja kita ane poeramo inosata? Waimbe'i katoewoe noe anggata ri Soeroega? Makoedja bare'emo tapokaeka da mate? Ndjaa ndato'o: Karodo ndaja? Bara da djela moeni i Poeë Isa? Ndjaa mamporioeka kadjela mPoeë Isa? Bara impia da kadjela moeni i mPoeë? Ndjaa da ndapowia mPoeë ana djela moeni? To'oka Noentoe mPorapa sa'e anoe manto'o poga'a nto lino. Waimbe'i lio noe lino, ane djela moeni i Poeë Isa?

### 18. Raja poe'oe mpolengko.

Roomo tapaoe ane meajamo taoe ri Poeë Isa, sangaja<sup>2</sup> da bali katoewoenja, da bali nawa<sup>2</sup>nja, pompaoenja, ponggalenja. Ane re'e nawa<sup>2</sup>nja anoe madja<sup>2</sup>a mampe-pewoloka roegi noe joenoe, bara baleparoe ri Poeë Ala, oengka mpeajanja ri Poeë Isa napakajoamo nawa<sup>2</sup>nja.

Ane madja'a pompaoenja ntongo i owi, mampetikodi joenoe, mambambasi joenoe, mampakadja'a raja noe joenoe, oengka ri peajanja ri Poeë Isa balimo rajanja pai pompaoenja, podo paoe madago, paoe mposintoewoe, paoe majoa anoe da nato'o.

Ane madja'a powiata ntongo i owi, magasi kita manawoesaka joenoe, balima kita, bara magasi pale mabobaki joenoe, bare'e ntani bangke raja ri joenoe, oengka ri peajata ri Poeë Isa, balimo gaoeta poera<sup>2</sup>. Sawanja tapakaroegi joenoe ri gaoeta, tapaporasi joenoé, tapokapoeroe jaoe.

Poe'oe mponawa<sup>2</sup>ta pai pompaeta pai gaoeta, sangaja<sup>2</sup> rajata. Ane madago rajata, pompaeta pai gaoeta poera<sup>2</sup> madago. Ane meaja kita ri Poeë Isa, mawo rajata ri Poeë sindate, kobelaanja podo songka mPoeë se'e tapobangke maloeloe. Ntje'e anoe ndapaporapaka kita i mPoeë, ndato'oka kita: Kadjoë anoe madago wotonja sangaja<sup>2</sup> madago powoeanja, kadjoë anoe bare'e madago wotonja madja'a wo'oe powoeanja. Ane taloeloe songka ngKoempania, maoe be ntani maboeja rajata, podo pewalinja anoe nakita ngKoempania. Paloeloeta songka mPoeë, sangaja<sup>2</sup> mopoe'oe ri raja. Ane taloeloe songka mPoeë, pai bare'e maboeja rajata ri Sira, bare'e bangke jowenja paloeloeta songka se'e.

Pantadjita denggo ndajata, sangaja<sup>2</sup> mapari taepe. Rapanja taoe sengke da mantadji kasengkenja. Ane re'emo wo'oe aoe da naposengke, da natodosaka rajanja. Tesaoko

bare'e mewali natodosaka, panangi si'a, nanangi ntjengkenja. Bara taoe anoe masina raja ri joenoe woengka eo, be naowe mampare'e paue madja'a anoe mampakadja'a raja noe joenoe, napari<sup>2</sup> mampapa'owe paoe setoe. Pai tesaojo bare'e nale'o maomo, panangi ri kasina ndajanja. Mewali saeo saeo mombeloekoe taoe anoe meaja ri Poeë Isa, denggo ndajanja napombeloekoeka.

Ri pombeloekoe se'e maoe panangi tesaojo, masae<sup>2</sup> da menangi kita, maka kakointi<sup>2</sup> pekekenita ri Poeë Isa, kakoroso<sup>2</sup> rajata maewa adanja anoe madja'a, rantani sawia<sup>2</sup> kodjo kita pai Poeë, anoe tapopandiri.

Songka anoe taloeloe<sup>2</sup> laoe ri padikaa anoe sampoejoe, laoe ri patoedjoe mPoeë Isa pai ana goeroea.

Padika anoe sampoejoe se'e lawi radoea tilanja. Santila manto'oka kita pe'oeroeta ri Poeë Ala; ntje'e padika ka'isanja rata ri ka'aoponja. Santila wo'oe anoe manto'o posintoe-woeta pai kasitaoeta, ntje'e oengka ri ka'alimanja rata ri kasampoejoenja.

**POMPEOASI:** Waimbe'i ane bali nawa<sup>2</sup>la? Ane bali pompaeta? Ane bali gaoeta? Ndjaa posokinja: kadjoë madago wotonja, madago wo'oe powoeanja? Ndjaa posisala mpaloeloe ntaoe songka ngKoempania pai paloeloenja songka mPoeë? Ndjaa napombeloekoeka nTo Masehi saeo saeo? Bara da menangi jaoe kita? Mbe'i kare'e wa'a ntjongka anoe da taloeloe?

### 19. Songka mpe'oeroe ri Poeë Ala.

Padika anoe ka'isa manto'o: Ne'e noepanjomba lamoan taninja. Posokinja: Ne'e re'e aoe tadika ri wawo mPoeë Ala bara ndjaa<sup>2</sup>. Ri laolita i Mokole Aha tongawa taoe mantalikoesi Poeë Ala, me'oeroe moeni ri lamoan. (Soera nT. P., No. 77). Ri laolita i Danieli tongawa wo'oe taoe anoe bare'e mampodjo da mampariwawo Datee ntaninja ri Poeë Ala, pai napantadjimo i Datee taoe setoe ri apoe bangke. (Soera L. nT. P. No. 97.)

Paikanja maoe dja mowoerake kita, bara meoni, bara mobolobiangi, bara motonaa, sangaja<sup>2</sup> tapetikodi Poeë Ala, sawia<sup>2</sup> setoe pai me'oeroe ri lamoan. Ewa i Mokole Saoeloe, mampalaika Poeë Ala, nepa ndjo'oe mampeoasi angga ntaoe mate. (Soera L. nT. P., No. 64.)

Padika karadoea anoe manto'o: Ne'e noeta'a bara ndjaa, noepolamoan. Ewa panta'a nTo Isaraeli ana djapi woejawa ri poe'oe boejoe Sinai, napanjombamo. (Soera L. nT. P., No. 29). Samba'a wo'oe napekita'a i Mokole Jerobeia. (Soera L. nT. P., No. 75). Bangke gaga katoewoe mPoeë, pai naka bare'e maja kita mampepali, bara manta'a kasilioa, da tapolamoa.

Pe'oeroeta ri Poeë Ala tongawa wo'oe ri padikaa anoe katatogo manto'o: Ne'e noeto'o<sup>2</sup> si ngkabongo to'o mPoeë Ala. Maka ane bare'e tapokaeka manto'o<sup>2</sup> ngkabongo to'o ntaoe, manoro bare'e tapokaeka taoe setoe. Ne'e wo'oe taposabe<sup>2</sup> to'o mPoeë Ala ri karakara anoe masiwoe. Rapanja tato'o: Ndakita mPoeë Ala powiakoe majoa, bara: Ndaintjani mPoeë Ala kabare'enja koepowia. Maoe montjo kita, ne'e tato'o ewase'e, boi tapetikodi Poeë Ala. Sangadi ndapokaoe mokoleta kita mamposabi to'o mPoeë Ala, da ndapaintjani kamontjo mpaoeta, taposabimo jaoe.

Naka tongawa wo'oe pe'oeroeta ri Poeë Ala, pangkekenita

Reme Minggoe, ewa panto'o mpadika anoe ka 4: Ne'e kodjo noekalingani Eo Minggoe.

Ndapokono i mPoeë Ala, kita taoe da medonge kodjo ri Sira. Paikanja pedongeta se'e ne'e wo'oe ewa pedonge ana, majoenoe ri songka mpoeënja. Ane laoe poeënja, naloeloe songka, ane bare'e laoe poeënja, bare'e naloeloe songka. Pedongeta ri Poeë Ala ewa pedonge ananggodi ri papanja pai inenja, maoe be laoe si'a, sangaja<sup>2</sup> naloeloe songka. Ntje'e ndapakanoto i mPoeë Isa ri Noentoe mPorapa ananggodi radoea, anoe napokaoe mpapanja lo'oe modjamaa: samba'a ndjo'oe, samba'a be ndjo'oe. (Soera Laolita i mPoeë Isa, No. 57.)

Sangaja wo'oe mampakatongawa kita ana mPoeë sindate, ane bare'e tasongka<sup>2</sup> ngkaliota katoewoeta, paikanja dja tapopea songka mPoeë. Ane ndapare'eka kita mPoeë pepa, ne'e wo'oe taponggantalika, ne'e wo'oe boi malose rajata ri Sira sindate. Maka ane medonge kodjo kita ri Poeë Ala, poera<sup>2</sup> anoe ndasongkaka kita tasabe madago<sup>2</sup>, maka Papata anoe masongkaka kita.

Taoe anoe medonge kodjo ri Poeë Ala, bare'e wo'oe bara napo'ipoe pewali ngkatoewoena, bara anoe momida narata, bara anoe mapai. Sangaja<sup>2</sup> rodo rajanja, sangaja<sup>2</sup> manga'a rajanja mampepwoloka katoewoena, maka sambela<sup>2</sup> ri Poeë Ala potandjenja.

**POMPEOASI:** Ndjaa nato'o mpadika anoe ka'isa? Ada noendjaa anoe sawia<sup>2</sup> pai manjomba ri lamoan? Ndjaa nato'o mpadika anoe ka 2? I sema sa'e masala ri padika se'e? Makoedja bare'e madago tata'a lio lamoan? Ndjaa padika ka 3? Makoedja bare'e madago taposabi<sup>2</sup> to'o mPoeë Ala? Ndjaa padika ka 4? Waimbe'i gori mpedongeta ri Poeë Ala? Waimbe'i ane tarata pepa? Waimbe'i taoe medonge ri Poeë Ala, ane napecpwoloka katoewoena?

## 20. Songka mposintoewoeta pai kasitaoeta.

Padika anoe ka'alima manto'o: Aja inemoe pai papamoe. Sako i Poeë Isa bangke pantoebenakaa inea pai papaa. Ewa pampetoeboe i Loek. (2 : 15) manto'o katedadji mPoeë Isa ri Jeroesale. „Naloeloemo moeni inenja pai papanja, djelamo ri Nasare, medonge kodjo ri inenja pai papanja.” Samba'a katongawanja taoe bare'e mantoebenaka papanja, ntje'e i Abisalo anoe maewa papanja. (Soera L. nT. P., No. 68.)

Paikanja re'e wo'oe totonja padika se'e manto'o: ne'e ndigara<sup>2</sup>ti, ndidjea<sup>2</sup>ni ananggodimi.. Maka poe'oenga, pai naka bare'e natoebenaka noe ananggodi inenja pai papanja, tesaojo banja ri ananggodi, paikanja ri inenja pai papanja kare'enja.

Banja wo'oe podo ineta pai papata da tatoebenaka: poera<sup>2</sup> taoe anoe tapotaoe toe'a da tatoebenaka, tapedongeka paoenga, ewa kapalata, mokoleta, wa'a ntjoero ngKoempania, goeroeta, panditata. Sangadi mosisala songka ntaoe setoe pai songka mPoeë Ala, songka mPoeë da tapariwawo.

Ane mekigadji kita, sangaja<sup>2</sup> taoe anoe mawaika kita saro da tatoebenaka. Pai kita anoe masaro taoe, sangaja<sup>2</sup> tapakadago wo'oe pompaeta pai gaoeta ri taoe tasaro se'e. Samba'a taoe anoe mantoebenaka kodjo poeënja, ntje'e i Eliese, anoe ndjo'oe mampepali ana we'a da naporongo noe ana mpoeënja. (Soera L. nT. P., No. 11)

Joenoeta wo'oe tatoebenaka. Ne'e tapetikodi joenoe, maoe watoea katoewoenja, kita mokole; ne'e mobangke<sup>2</sup> kita ri joenoeta ri karia noe doita, bara kabangke noe reke ndajata pai kalo'e mpaleta. Maka pombai mPoeë Ala poera<sup>2</sup> doi pai reke ndaja pai kalo'e mpale.

Ri pangkita mPoeë Ala sawia<sup>2</sup> taoe. Ntje'e pai naka bare'e madago mobangke<sup>2</sup>; podo samba'a anoe bangke

kodjo katoewoea, ntje'e i Poeë Ala. Samba'a katongawanja taoe mobangke-bangke, ntje'emo i Hamani ri laolita i Seteri. (Soera L. nT. P., No. 102.) Taoe anoe meaja ri Poeë Isa, bare'e lioe<sup>2</sup> maja si'a mobangke<sup>2</sup>; lawi ndato'o i mPoeë Isa: Maka taoe anoe mobangke<sup>2</sup> ngkatoewoe, ntje'e da ndakodisi; pai taoe anoe mampetikodi koronja, ntje'e da bangke katoewoenja ri poerinja. (Loekasi 18 : 14.)

Mewali anoe ndapokono i mPoeë Ala, da tapakakodi katoewoeta. Samba'a pandiri ntaoe anoe ewantje'e, i Tadoelako ri Kapenaoe, anoe merapi ri Poeë Isa ka'osa noe ana majoenenja. Kakodi ngkatoewoenja naepe, pai naka bare'e nawai i Poeë da mempone ri banoeanja (Soera L. i mP. I., No. 23; Loekasi 7 : 1-10.) Pagonja Poeë Isa se'e taendo<sup>2</sup>, maka maoe Ana mPoeë Ala katoewoea, dja ndapakakodi katoewoea, pai naka djela ri wawo lino se'i.

Padika mPoeë Ala anoe ka 6 manto'o: Ne'e mepepate. Ewa kasangkompo i Joesoepoe sakodi napepatemo toea'inja (Soera L. nT. P., No 16); ewa i Daoedi mampepate i Oeria da napamporongo we'anja. (Soera L. nT. P., No. 67.)

Paikanja maoe bare'e toedoe paleta mampépate joenoe, re'e gaoeta anoe ndapasiwiaka mPoeë pai pampepate taoe. Ane tapepepara joenoeta, ane tapodjangai joenoeta, bare'e montjo poe'oenga, ewa tapepatemo. Maka poe'oenga pai naka re'emo taoe mampepate joenoe, maka pamosarinja si'a be montjo. Peolemo, kasangkompo i Joesoepoe: pamosarinja toea'inja, bare'e re'e poe'oenga kodjo, pai naka sakodi da napepatemo si'a. Peole i Joedasi: ma'ai gaga pamosarinja i Poeë Isa pai napampabaloemo. (Soera L. mPoeë Isa, take 112; Loekasi 21 : 37; Loek. 22 : 6.)

Ane taoe madja'ati kita, be maja tapesawaki ngkaliota; i Poeë Ala maintjani djaja mpesawa.

Anoe ndapokono i mPoeë, da tapokapoeroe joenoe, maoe madja'a rajaña ri kita. Paintjani noe wa'a ntoekaka i

ndasaro pai anoe masaro? Makoedja pai tatoeboenaka wo'oe joenoeta? Madago kita mobangke<sup>2</sup>? Weno e panto'o mPoeë Isa ane mobangke<sup>2</sup> taoe? Ndjaa ndapokono mPoeë Ala ri kita? Pejoemboe pandiri ntaoe anoe mampakakodi katoewoenja? Ndjaa padika mPoeë Ala anoe ka 6? Ndjaa ndapasiwia mPoeë pai pampepateta taoe? Bara madago tapesawaki sala noe joenoe ri kita? Takoedja taoe anoe madja'a raja ri kita? Makoedja banja dangga taoe anoe bare'e mesawa? Ndjaa menangi ri kadja'a ndaja noe joenoe? Bara dago ngkatoewoe ngkaliota taendo<sup>2</sup>? Makoedja bare'e madago menoo?

## 21.

Songka mposintoewoeta pai kasitaoeta (Sepenja).

Songka mPoeë Ala anoe ka 7 manto'o: Ne'e mosalara. Pandiri ntaoe maloeloe songka se'e, ntje'emo i Joesoepoe, anoe bare'e mampokono madjama we'a mpoeënja. (Soera L. nT. P., No 17.) Anoe bare'e maloeloe songka se'e, ntje'emo i Daoedi masago we'a i Oeria. (Soera L. nT. P., No. 67).

Paikanja banja podo pasago we'a anoe bare'e ndawai mPoe'e. Sako mampatoewoe nawa<sup>2</sup> mposalara bare'e ndawai. Ane re'emo nawa<sup>2</sup> madja'a se'e, maoe bare'e mewali toeama madjama we'a ntaoe, bara we'a bare'e mewali madjama toeama anoe lawi morongomo, sangaja<sup>2</sup> napomasalamo ri Poeë Ala, anoe mangkita nawa<sup>2</sup>ta.

Maka korota se'i da napearl noe Inosa mPoeë Ala; paikanja ane bare'e magali nawa<sup>2</sup>ta, bare'e maja tapasambaka pai Inosa mPoeë Ala anoe lawi magali. Moroeana korota ne'e tawai mogaoe madja'a.

Sangaja wo'oe anoe ndato'oka kita ri padika se'i: Ana we'a pai ngalitaoe bare'e madago mombewongo<sup>2</sup>ni. Podo pinatoewoe anoe bare'e naintjani mantodosaka kamawo

## 50

Joesoepoe ka'i joesoepoenja anoe Ampoelumba, maeka raja ri, nato'o: da napesawakimo kita pampobaloeta si'a. Paikanja mesono i Joesoepoe: Ne'e maeka, bare'e koeowe<sup>2</sup> mampomawo komi. Maoe modenggo powiami owi ri jakoe, poeramo ndapakajoa mPoeë Ala gaoemi anoe modenggo. (Soera L. nT. P., take 46). Poeë Isa se'e mampekakaika taoe anoe mampepate Sira. (Soera L. mP. I., take 127; Loekasi 23 : 34). Ewantje'e se'e pekakai i nTjetepanoe ri 'kapatenja (Soera L. mP. I., take 148; Soera laolita wa'a anagoeroe, 7 : 60).

Sa'e manto'o: Dangga taoe anoe bare'e measwa. Bare'e montjo paoe se'e. Lawi raja ntaoe da mampesawaki gaoe noe joenoe anoe madja'a. Pai si'amo maroso pai makodje, anoe maintjani mantodosaka raja ri. Ane tapesawaki dja'a noe joenoe, da te'aiwakamo kadja'a ndajanja. Paikanja ane bare'e taowe<sup>2</sup> mampokapoeroe si'a, masae panangi kadja'a ndajanja. Ewa i Mokole Saoeloe ri padoedoekinja i Daoedi, sangaja<sup>2</sup> panangi raja ri ane napokapoeroe i Daoedi si'a (Soera L. nT. P., No. 61 pai 63.)

Anoe ndapokono i mPoeë: da takadoedoengi taoe poera<sup>2</sup>. Ne'e tapeoasi: To koedja si'a? Ne'e wo'oe tapepali sili ngkapoeroe ndajata. Ntje'emo anoe ndato'o i mPoeë Isa ri Noentoe mporapa: To Samaria mampokapoeroe To Jahoedi. (Soera L. mP. I., No. 40; Loek. 10 : 25-37.) Ne'e podo dago ngkatoewoeta ngkaliota taendo<sup>2</sup>, anoe joenoe bare'e tapomasoesa. Ntje'emo sala ntaoe kore'e ri Noentoe mPorapa radoea, pai naka bare'e djela angganja ri banoea mPoeë radoea, (Samba'a: Taoe kore'e pai taoe kaasi-asi, Soera L. mP. I., No. 49; Loek. 16 : 19-31. Samba'a: Taoe kore'e mawangoe ala maria: Soera L. mP. I., take 74; Loek. 12 : 16-21)

Ne'e wo'oe kita menoo. Maka inosa anoe ndawaika kita i mPoeë Ala bare'e madago tajali ngkaliota.

POMPEOASI: Ndjaa padika mPoeë Ala anoe ka 5? Ndjaa totonja? I sema sa'e wo'oe tatoeboenaka? Waimbe'i taoe

ndajanja, kita taoe pepokono ndaja mPoeë, sangaja<sup>2</sup> da morongo mpodago-dago, gori ada ntaoe.

Porongota se'e, samba'a we'a pai samba'a toeama da morongo. Ri porongota sangaja<sup>2</sup>da mosintoewoe mpodago<sup>2</sup> toeama pai we'a, mombekadoedoengi, mombeposikojo kanee ndajanja pai kapari ngkatoewoenga. Kamontjonja, porongota dja poera ri kapteta.

Padika mPoeë anoe ka 8: Ne'e melima. Mosisala djaja mpelima i Akani (Soera L. nT. P., No. 43), pai djaja mpelima i Djahasi (Soera L. nT. P., No. 83) paikanja sawia<sup>2</sup> salanja. Mariapa djaja mpelima: ane tasabo anoe joenoe pai bare'emo tapapewalili moeni, sangaja<sup>2</sup> melima kita. Ane tapotaoetengo, bara talego joenoe, da tapale'o anoenga, sangaja<sup>2</sup> melima kita. Ewa i Jako mantengosi papanja, da napale'o panta. (Soera L. nT. P., No. 12.) Ane bare'e tawai tombo ntaoe anoe motetala ri kita, sangaja<sup>2</sup> melima kita.

Maoe tale'o doita, rengkota ri kadojota, kamontjonja i Poeë Ala toempoenga. Bare'e ndapokono ane re'e anoeta maria<sup>2</sup> tapobebeka joenoe. Ewa ri laolita i Naba anoe mampomanongo i Daoedi. (Soera L. nT. P., No. 62.) Bare'e wo'oe ndawai tabolontanaka anoeta ri kabare'enja tareke mpodago.

Sangaja<sup>2</sup> raneonja da ndapeoasi mPoeë Ala ri kita waimbe'i pampakorota wa'a rengko pai doi anoe ndawaika kita. Ntje'e anoe ndapakanotoka kita ri Noentoe mPorapa: Mokole mantilaka ana majoenoenja doi da napampojoro<sup>2</sup>ka. (Soera L. mP. I., take 93; Loek. 19:13, 15.) Pai Noentoe mPorapa: Taoe mangkariani bonde anoe bare'e majoa. (Soera L. mP. I., take 99; Loek. 16:1-13.)

Padika mPoeë Ala anoe ka 9: Ne'e kambamba<sup>2</sup>. Ewa i Anania pai i Sapira mambambasi i Petoeroe. (Soera L. mP. I., No. 81; Soera Laolita wa'a anagoeroe, 5 : 1-11.) Maoe pombambata ri pampokapoeroeta joenoe bare'e madago; rapanja: takita sala noe joenoe, tato'o: Be koekita.

Sangaja mbambata, ane tanoentoeki joenoeta, maria ngaja anoe bare'e montjo tato'osi; tapakakodi raja noe joenoe ri taoe setoe pai naka bare'emo napokono.

I Poeë Ala majoa sangkani, bare'e re'e denggo ndajaa, pai naka bare'e ndakoto mampedongka mbambata.

Padika anoe ka 10 manto'o: Ne'e noeporaja-raja anoe joenoe. Taoe mamporaja<sup>2</sup> anoe joenoe, saroe<sup>2</sup> manjaoe raja i joenoe, saroe<sup>2</sup> naepate si'a. I mokole Aha ma'ai pamporajanja bonde i Nabo pai napampepatemo si'a. (Soera L. nT. P., No. 79.) Ewantje'e i Kai pai i Abel: Bare'e napokono i Kai toea'inja madago katoewoenga, si'a bare'e, pai napampepatemo. (Soera L. nT. P., No. 3.)

Moroeara kita ewa i Boerahima anoe bare'e naporaja anoe joenoe. Maka ri pampelaenja To Sodomo, mesonomo mokole nTo Sodomo: Timamo rengko mami poera<sup>2</sup>; paikanja nato'o i Boerahima: Bare'e! timamo moeni anoemoe, rengkokoe lawi maria ndawai mPoeë Ala, banja siko da mampakakore'e jakoe (Soera L. nT. P., take 12).

Poe'oe mposintoewoeta pai kasitaoeta, ntje'e ndato'o mPoeë: Ewa pepokonomi da ndipampowiaka ntaoe, ewantje'e wo'oe da ndipampowiaka taoe.

**POMPEOASI:** Ndjaa padika ka 7? I sema mangaloeloe, i sema bare'e? Bara wa'anja padjamata we'a ntaoe, bara langkai noe joenoe anoe ndapodjangai mPoeë Ala? Makoeja pai tapampakagali nawa<sup>2</sup>ta? Waimbe'i katoewoengalitaoe pai ana we'a? Waimbe'i lio mporongo nTo Masehi? Ndjaa padika anoe ka 8? Imba djaja mpelima ntaoe. Waimbe'i da pampakorokata anoeta? Bara ndapeoasi dja mPoeë Ala raneonja gori mpampaketa anoeta? Ndjaa padika anoe ka 9? Ndjaa sa'e mbamba ntaoe? Ndjaa padika anoe ka 10? Wenoe ane bare'e taloeloe songka se'e? I sema sa'e bare'e naloeloe songka se'e; i sema maloeloe jaoe? Ndjaa poe'oe mposintoewoeta pai kasitaoeta?

Se'imo sampiejoe pai roea ngaja, anoe naaja  
nTo Masehi poera<sup>2</sup>.

---

1. Koeaja Poeë Ala, Papata anoe makoeasa, anoe mampapewali jangi pai lino.
  2. Koeaja Isa i Masehi, ana mPoeë Ala anoe samba'a<sup>2</sup>, Poeëta,
  3. anoe ndapapewali noe Inosa mPoeë Ala ri ana we'a Maria,
  4. anoe nahoekoe i mPontioe Pilatoe, ndapakoe ri kadjoë ndapapombepampa, mate, ndadika ri koemapa, mena'oemo ri taoe mate,
  5. membangoe moeni oengka ri taoe mate, ri katogondemenja, mepone ndeki Soeroega, motoenda tondo ri kana mPoeë Ala, Papata anoe makoeasa,
  6. oengka lairia da ma'i moeni Sira, mampakamara joa pai denggo ntaoe toewoe pai taoe mate.
  7. Koeaja Inosa mPoeë Ala.
  8. Koeaja Kasandaja<sup>2</sup> mPoeë Isa anoe magali pai djoekoe<sup>2</sup> kare'enja.
  9. Koeaja pokasangkompo nTo Masehi montjo, ri Poeë Isa.
  10. Koeaja kapoeroe ndaja mPoeë Ala mantadji salata.
  11. Koeaja pembangoe ntaoe mate.
  12. Koeaja katoewoekoe ri jakera, anoe bare'e da re'e kapoesanja.
-

Sura mpoagama utam amu mesua sidi maselis

1. Jayo mpanayonta into lino ri Pue Ala Sindote
2. Paincuni utam : Pue Ala
3. Sura i mPue Ala
4. Pue Ala
5. Pamparenta : mPue Ala tolino
6. Solo into lino
7. Amu indasliko : mPue Ala solata ri Sira
8. I Tade nykadago
9. Pompagura : mPue Isa
10. Katesosu ncalata
11. Peaya ndaya
12. Kutebalisa ka ndaya
13. Kartuna amu magadi
14. Kartuna amu magadi (sepunya)
15. Pelakai ri : Pue Ala
16. Ulia negkasanbanya - ndanya : mPue Isa
17. Kubanu nu Angga
18. Rayo pun mpoleng keo
19. Songka mpe'uru ri : Pue Ala
20. Songke mposinturta paik Kasitauta
21. Songke mposinturta paik Kasitauta (sepunya)

Se'mo sampulu paik rwa ngaya, amu naanya Jto Maseli puro-puro.